

道存遺稿集


特 260

499

6 1 2 3 4 5 6 7 8 9 10 1 2 3 4 5

始





昔信仁德為存外也
生死福禍信命之至

明信年三月十七日尚
四十九葉之生の感終
子之子の喚者株子於
物少くは書以補教

書之信存

道存遺稿序

炎宋明教大師曰。道不獨弘。弘之由人。雖然。道有通塞。猶如
運有泰否。吾道通則布化於十方。吾道塞則養德於山林。而
佛祖單傳無等等之大道。自存于茲。不垢不淨。不生不滅。不
增不減。其通與塞。非復所吾關也。武州淨空院無等道存和
尚。別稱靈隱。文政九年誕于越之後州中頸城郡高田街。俗
姓宮野。後有故改大佛。資性穎異。幼有出塵之志。嬉戲常事
禮佛誦梵。一日。有化僧過家。和尚得父母允諾。就請薙染受

具。僧知其爲道器。許之。爾後。參叩諸方耆宿。及壯入東都旃檀林。又登叡山。辨道修學。學該內外。識貫古今。人咸稱棟梁之材。既而。聞賢及老漢。揚化于東都長谷寺。往投輪下。刻苦勵精。究一大事。遂得印證。入室嗣法。後隨法叔青松寺魯衷老漢。刀耕火種。老漢爲授要職。和尚潛行密用。日夜竭誠。內外倚重焉。首住城南源昌。瑞世永平。參內拜綸綍。尋應菅沼氏請。住其香華地淨空院。領徒匡衆。將布化其于十方。時偶屬大政維新。排佛毀釋。徒跋扈于朝野。大道不通。教運否塞。

於爰乎。和尚退養其德。逍遙烟霞。吟嘯風月。蓋竊待化機之熟也。明治十年五月十九日疾病示寂。世壽五十有二。佛天若藉之以齡與時。則其雲蒸龍變。必有不可端倪者矣。其剃度輔教子。受記囑。苦修練行。奮紹遺志。恢弘祖道。挽回教運。惟和尚在那伽定裏。必當莞爾也。今茲輔教子集錄和尚遺稿。以附梓。蓋酬恩海之一滴也。語曰。詩者心聲也。書者心畫也。若就此汗青。高着眼則。乃能究盡佛祖無等大道。始與和尚無第二面矣。剞劂告成。輔教子乞序於余。余與和尚爲法

從兄弟。且壯時有管鮑之交。因茲敘其小傳與本書印行所
由。云爾。

大正十一年四月如意珠日

勅特賜圓證明修禪師永平元峰撰

（此處為極淡之印文，內容難以辨認，疑為出版或收藏之印記）

道存遺稿

嗣子 此郎輔教編輯

初春俳體

隔竹香穿鼻。開窓色滿堂。雲寒凝雪白。月冷琢珠光。
豈比程夫子。休論傅粉郎。百花應北面。南面此花王。

窓前聽風

愛此幽居物外情。宜風宜雨更宜晴。北窓松栢南窓竹。
兩種能為一種聲。

過天樹寺

水村行盡又山村。剝啄來敲古寺門。夏可涼風秋可月。
溪流一帶繞籬根。

靜坐水亭

天樹寺所在

微倦拋書意自閒。水亭幽趣隔塵寰。城中豈有涼如許。當面清流背面山。

牽牛花

點綴籬笆化手工。重重蔓衍小園中。帶蛛病葉踈炎日。引蝶嬌花列曉風。瑪瑙光和清露白。瑠璃色映彩霞紅。朝來宴罷歌臺寂。擲盡天杯賜野翁。

夏末秋初

炎熱初消大火流。夢魂猶遠舊江頭。秋隨早雁涼思動。夏逐殘螢暑色收。南浦魚肥漁叟喜。北林蟬咽老僧愁。煙波十里西風暮。蘆荻叢邊月似鉤。

新涼

一雨消炎熱。前山景物幽。銀河珠露滴。翠壁火雲收。草際殘螢少。波心片月浮。新涼詩興足。立盡二更頭。

禮即身佛

溪水潺湲山寂寥。老僧來話上人謠。肉身不轉覺身現。坐聽松風兼海潮。猿聲鳥語且相親。松風墨畫明真意。此地來遊證舊因。猿聲鳥語且相親。松風墨畫明真意。他禮長年坐脫身。

閑中富貴

淨几明窓對古人。清閑笑我未全貧。鶯金梅白般般美。月壁風瑤物物新。但使有詩能記景。何妨無曆不知春。吾曹甘受原天爵。敢逐浮榮混世塵。

喜舊朋至

月下柴門有客敲。玄談一夜倚書巢。俱餐黃獨評新味。且啜烏甌話舊交。白髮難消頭上雪。紅顏易老水中泡。請君爲說無迷悟。意馬心猿未免嘲。

古城螢火

戰血膏凝鬼火生。飛來故故映荒城。流光界水屯千陣。
冷焰穿雲走萬兵。勝敗有機餘殺氣。廢興無跡絕邊聲。
胡笳吹斷今何夕。宛似繁星照野營。

便面雙蝶圖

梨園花簇簇。菜圃蝶翩翩。一手誰揮去。雙姿寫得妍。

塔燈

寶山常放玉毫光。高掛天中法焰揚。照破人間歌舞地。
燒殘佛界菩提場。光穿九土通泉路。影入長空接太潢。
不夜靈臺無盡劫。遍教迷悟就清涼。

塔鈴

三千禮樂半天中。滴滴丁東附梵宮。平等傳心談頓漸。
四邊得意話圓通。舌端消息有非有。言外法門空不空。

今古道。人高着眼。何關竹雨與松風。

鷄冠花

群鷄面面媚西風。綠羽朱冠小苑中。晚際低頭如啄粒。
埒邊舉頭似窺籠。

謁賢及禪師詠堂前木犀時安政乙寅中秋後三日

逐氣尋香上佛天。閻浮樹下拜金仙。即今欲問拈華旨。
翻被西風鼻吼穿。

紙帳

四面高懸一室中。浩然孤坐似虛空。居人也擬冰壺室。
宿客應疑玉兔宮。粉壁無塵雲洞壑。明窓不夜雪房櫺。
任他裁錦剪羅去。爭及吾家清白風。

歸燕

海外尋花至。江頭背月飛。他鄉寧誤節。故國便知歸。

引子辭村舍。追人渡釣磯。明年春社約。敢失問幽扉。

寒夜

風刀剪紙似刺身。縮首如編手亦龜。膚不重衣牀不褥。狂言此道在清貧。

山村隔雪

四面溪山雪幾重。漫天瓊屑逐迴風。晚來忘却歸家路。身在仙壺白玉中。

人日

元日忽人日。今春勝去春。年年身覺老。世世孰知新。柳眼長欺客。梅唇却笑人。韶華不相待。先我度江濱。

春聲君

箏聲洞徹半天中。疑是明皇出漢宮。驟雨曳裳低塞北。釀晴舒線過江東。幽音緩急追佳氣。片影高閒閃遠空。

月姊星娥應共待。封姨放汝路相通。

瓶中雙清

磁瓶膽大類雙清。片片香濃影亦明。元是佳人同几席。誰言高士異心情。縞衣翠帶呈嬌色。庾嶺湘川表美名。自歎吾曹無傑思。看來狂做一般評。

同枕山翁社中諸子訪活宗和尚分句得心

探春入幽谷。覓句訪叢林。柳色添真偈。鶯聲助妙吟。觀花同俗眼。聽鳥會禪心。最好斜陽景。清沈賞轉深。

春晚書山家壁

問是天心有兩情。一峰暎靄一峰晴。山家冷殺花猶未。唯聽黃鸝竹裏聲。

夏日幽居

晦蹤林下學無能。天把高閑付衲僧。夕雨送涼宜讀坐。

半窓清月當孤燈。
 博山香燼夜三更。
 破窓月漏影晶瑩。
 清江一曲匝階前。
 看他 不語水中仙。

三隱詩開講

三隱同情一曲歌。
 應把歸來勸自他。

再會禪友

遠別悠悠喜再逢。
 月落烏啼城外鐘。

嬉春詞

點檢花開取路還。
 斜陽幾處鳥閒關。

也為尋春豎得閑。
 軒窓夢覺又驚春。
 此聲偏惱苦吟身。
 雨意風心共妬春。
 也被黃公惱此身。
 百尺垂楊繫幻身。
 燕語鶯聲問荅春。
 蠶戶漁村海接山。
 攪破遊僧半日閑。
 花翻白白紅紅亂。
 也知富貴一朝塵。

春楓

丹楓二月勝紅芳。
 一段嬌容屬夕陽。
 千古未逢官貴寵。

朱門誰比錦衣裳。

花下睡猫圖

嬾眠閑傍牡丹枝。 蛺蝶翻邊和夢窺。 莫羨翩翩渠自在。 不如捕鼠自由時。

留別枕山翁

春風攪夢客魂驚。 歸雁催人趁遠程。 豈爲嬌花生滯念。 敢教啼鳥盡餘情。 今春縮柳江東地。 他日聞鶯海北城。 縱有水雲千里隔。 終年不負舊詩盟。

題山居幽趣圖

慘澹經營畫趣奇。 溪山有勝豈無詩。 這般幽景何人會。 惟有清風白月知。

端陽書懷

三日過江東。 花風賞柳風。 五日到海北。 菖叢弄蒲叢。

七日何所處。 臨流問大空。

綠陰煎茶

矮榻松筠下。 微風泉石邊。 遠山雲擁石。 幽澗雨添泉。 香茶和香水。 香味勝趙禪。

五月山路聞鶯

翠壑丹崖取路新。 鶯歌上下與人親。 此行也勝花時節。 眼領深陰耳占春。

贈道友

問道君須行。 修禪我未全。 生前宜學道。 死後欲參禪。

圓兒

一几橫陳共領春。 團圓促膝好相親。 看花指月如無主。 取酒拈詩不辨賓。 方外結交聯璧客。 滿堂排列聚星人。 坐來自訝謫仙會。 宛似孀娥推玉輪。

蕉扇

新裁綠葉製偏工。回視蒲葵陋不同。卻熱那曾煩竹雪。招涼不敢借松風。豈隨斑女遮顏面。應伴維摩拂色空。只願人間暑長在。四時令汝奏奇功。

夏夜

月白風清雨初收。蒼梧影冷氣如秋。更深此勝無人話。自照心頭坐石頭。

喜雨

白雨傾盆特地過。午炎一洗晚涼多。村歌社舞知何曲。報答先天第一歌。

過米嶺

山頭雨過雲歸岫。海面波平水隔巖。半日天晴風也死。雙眸萬里認征帆。

越水吳山路幾程。山腰曲折水縱橫。殘雲剩雨淋漓墨。人在元暉畫裏行。

自絳綵過六日街

南薰時節百花濃。判白批紅興不窮。若使儂爲花吏部。一同萬里作春風。

過久保田氏絕句

三山一水接天開。倒影欺人入酒盃。默不賦詩君莫笑。每逢佳景口如鎚。

秋海棠

臙脂姪姪小紅粧。獨傍階頭暗斷腸。寄語風師兼雨伯。相依莫妬欲他狂。

默默菴偶詠

鳥報寒仍暖。花呈色即空。野僧時念咒。言默坐春風。

水漲青溪雨。雲收碧樹風。萬機休罷底。隨意洗梧桐。
園小多甘果。屋疎稀貴賓。同盟猿鶴外。月自訪清貧。
幽莊人跡斷。繡卷領三餘。夜雪憐貧道。玲瓏照讀書。
朝看白雲出。夕見白雲歸。但有雲來去。遊人到此稀。

重三

山迎上已帶煙霞。敢擬蘭亭趣自加。偶爾舉觴驚佛勅。
依然口默見桃花。

春晚

鶯聲燕語落花霏。柳岸桃溪總晚暉。廿四番番何處所。
東皇晦跡引春歸。孤村落日坐凄然。笛聲吹斷江樓月。
新綠成陰雨洗天。誰是春心屬杜鵑。

午睡

綠陰深鎖畫偏涼。讀罷楞嚴重炷香。日永僧堂禪夢穩。
洞天何必問仙方。

梅雨

漠漠松林雨不休。煙村十里接江頭。幽溪水漲柴門外。
獨木橋流晚喚舟。

留別植村蘆洲

問禪問詩情相親。參詩參禪物皆真。談話千般千古事。
禪心詩心證舊因。君不見。淵明詩心達祖髓。後山詩
心洞家旨。畢竟妙處存此中。適詩理處適禪理。又不
見。東坡之才佛印癡。如滿之禪樂天詩。今來古往道
何隔。詩也禪也交如斯。一夜漏聲聞不忍。鷄鳴催人
思不盡。此去朝天非余心。但恨詩林隔禪林。

題畫

青山白水入高秋。日落蘆灣繫小舟。絲是柳枝鈎是月。笠簔引影過溪頭。

雪

江山白盡掠蒼空。寶樹莊嚴絕異同。不是普賢清淨界。便知天上水晶宮。數尺方塘窄不寬。匹如仙士水晶盤。晚鴉朝鷺今何處。往日圍碁只一般。

櫻花絕句

錦幕連天膩露光。依稀此處是仙鄉。朝來愛戀淡粧女。不啻花芳名亦芳。

無題

柳里花鄉了一生。詩禪到處太多情。余心欲答仍無答。默默之中趣自清。

市店忙忙野店閑。禪心敢與世相關。閑忙一等無論地。許汝風流放往還。

誕生會

白雨青山洗出新。乾坤指上現全真。這般面目人知少。錯把頑銅鑄佛身。

重五

身在東關憶北堂。每逢佳節望家鄉。客腸此病醫無藥。萱草生憂竟未忘。誰嘗藥草保長年。我是雲游不老仙。此土回途轉身去。三禪妙樂四禪天。

聽雨

秋風一轉雨新添。滴瀝聲中倚竹簷。靜坐燒香聞更好。琴心筑語在疎簾。

詠石示禪徒

丈人喝散白雲眠。喚不回頭太可憐。說與僧伽須早計。疑疑却落二三禪。

留別東都諸友

林下水邊牽興長。都門惜別却淒涼。孤生碌碌風流減。逸士翩翩翰墨揚。胡燕馴人忘去路。蜀鵲向客報歸鄉。游僧所在原無累。也爲吟緣易斷腸。

首夏

到處悠悠便我家。無心去住任天涯。閑行觸物吟情動。默坐依人瘦影斜。山店碧雲浮嫩酒。江亭寒水淪新茶。三春萬象今何在。看了浮花不是花。

愁懷

世態無形自有成。蕭騷秋意入羈情。古來誰保百年命。

行處獨憐今日生。入夢怕聞胡地陣。放眸愁見漢家營。想他天寶開元際。多少才賢淚涕橫。

過驚婦谷

成佛誰疑舉世稱。度生未盡却無能。驚人餒魄今猶在。虛谷應聲喚即響。

登吉祥山途中

野水溪橋過幾村。遠携菜葉遡流源。源頭佛法真消息。無舌巖根說法門。鐵錫攀登到此間。却恐音容人會少。幽溪四面碧孱顏。奇峰兀立水潺湲。

余赴京師途中訪益豐禪師禪師偶有法務遠赴他州不能面

晤閑寂之餘偶賦四韵以待歸山時安政丙辰中秋後二日

數日愁霖漸放晴。離山姬水入雙明。馴樵瘦犬隨人影。

傍艇幽禽逐櫓聲。東里衲僧增佛日。西村野客富秋耕。帳然起立望天際。只待金仙擲錫行。

次孤山春望韻賦懷詠慈麟和尚

清談添竹細。翰墨引情深。柳眼含青色。梅唇笑苦吟。詩存無韻曲。調在斷絃琴。清賞誰聞者。妙音傳古今。

次十四夜月韻

江山百里月如霜。袁渚庾樓風趣長。此夜清光人賞少。九分光勝十分光。

觀鐵翁和尚谿山無盡圖

樂在溪山不易論。看圖誤覓草鞋痕。吟身始信無聲畫。宛似谿頭所歷村。

過枋木嶺

深林鬱鬱晝陰陰。一道幽溪水奏琴。始見煙霞仙世界。

人聲絕處有清音。

謁北野廟

管領梅花作花主。曾非厥罪謫西浦。明君一悟護皇基。長使人天感雷雨。

同星巖翁通天橋觀楓

一道幽溪兩岸楓。風飄錦繡夾長虹。通天路上袞裳去。落日牽人百丈紅。

高尾觀楓

山頭水尾日西斜。影落溪灣艷勝花。却想公卿遺愛跡。千秋未醒醉流霞。

過一谷

曾聞將卒化成螿。一谷之間百感生。鐵嶰山頭傾耳去。萬兵聲變萬松聲。

登天王寺浮圖

層層涌出聳虛空。四面紅雲擁梵宮。塔下褰裳登塔上。身疑羽化半天中。

過楠公墳

動地金剛力。補天鐵石腸。忠心含紫極。智劍射珠光。所向鑿強儻。每人稱武侯。英名如一日。萬古老楠香。

山中溫泉

海北靈泉地。山中別有天。消愁誰換骨。療病自疑仙。勝景浮頭上。奇遊落眼前。朝々三日浴。不覺入安禪。

雪

何唯水面與山容。匝地平鋪路欲空。知是門庭人換例。不題鳳字畫銀龍。

先師佛來及老和尚大練忌掃塔伸感懷

稽首燒香咨嗟長。世愛日過憂未過。默默之中真情味。豈與他輩話餘波。天上設有龍華約。人間痛哭薤露歌。金棺遠乘法雲去。花鳥哀鳴感懷多。此時此事心話口。世上無人可同科。余心惆悵憑誰訴。嗚呼天其如我何。惟有彌天降煙雨。暗和悲淚濕袈裟。

雨中作

樵窓坐雨夏生寒。滿地莓苔翠未乾。燕子歸來人不見。一叢紅藥映彫欄。

首夏過墨水戲作

花陰漸少柳陰多。兩岸薰風掠綠波。猶有游船載歌妓。三絃幾處按新歌。

次張喬贈仰山禪師歸曹溪韻賀知玄禪哲首飯林泉巨剎

越山忘去路。金澤辨疎親。眼上觀聲語。眉端了色身。

林泉初別日。水石再逢春。玄理歸君手。要須復舊真。

竹間梅花

山陰日暖水煙堆。一樹梅花竹裏開。爲問晉時王隱士。應疑不是雪消來。

瑞香花

蓬萊闕下紫雲揚。花滿庭階色滿堂。何用麝臍與龍腦。絕勝金殿御爐香。

草津溫泉途中

千山一水界東西。阻路人家聽犬鷄。若有華人來此境。應言我土若耶溪。

送祥麟禪者

浮雲流水水雲流。自笑他鄉話古鄉。到處清風與明月。勸君此事在心頭。

盆菊

欺霜傲雨氣增豪。白髮蒼顏意自高。古代清標今代色。依然不改舊時操。

詠十日菊

觀法緇僧誤後期。白衣宰相待東籬。相看佇立無言語。也被徵君笑我癡。

老圃秋容圖

荒蕪菜圃淡秋暉。薄暮畦邊瘦蝶飛。戴笠窮人憑杖立。荷鋤野老摘茄歸。春蔬逐日全將盡。晚菊欺霜獨未微。去矣行僧三徑畔。殘英一片貼麻衣。

深閨織素圖

機杼鳴鳴鎖暮煙。紗窓岑寂有誰憐。金梭響處聲逾好。玉手揚邊態轉妍。墨子拈絲悲不息。鮫人助織感相傳。

設存錦字回文樣。其奈新綾一片鮮。

秋盡

北風裂面氣生寒。野色蕭條不耐看。今日專權南燭子。綴丹獨自飾吟壇。

水仙

黃冠翠帶小神仙。好與梅妃證舊緣。環珮參差○○○。娥眉淺澹向寒天。湘靈夢裏風和雨。騷客吟中月墮煙。最是更深夜定後。幾回轉盼影相隣。

書燈

案上舒書業未成。耕夫織婦笑貧生。癡心敢恥傳螢火。苦學何妨借雪明。耿耿應憐窮士意。玄玄未悟古人情。百年活計禪餘事。照出先賢幾姓名。

水聲

愛山不識有餘清。仁者何加智者情。此意誰其知道了。一痕殘月導溪行。

蕉窓聽雨

空床坐雨客魂消。半夜燒香伴寂寥。此際宜詩又宜畫。窓前竹外有芭蕉。

竹窓對雪

六出花飛亂不收。茅菴護竹引清愁。破窓自有天然句。白鳳凰來入案頭。

示賣花翁

素白殷紅重一擔。將來特地問禪菴。半錢不買心華外。堪笑當年老瞿曇。

桃源圖

誰言避世住青山。不識仙源在世間。寄語漁郎休外慕。

人間世界即仙寰。

芍藥花開憶牡丹。

眞妃葬雨奈凄寒。盡日幽園傍藥欄。假有佳人朱粉好。
君王惆悵不堪看。獨占芳園第四春。若使楊妃呈麗色。

燕 子 花

趙妃舞罷下歌臺。水面凝粧不肯回。却是王孫遺愛跡。
至今香色爲君開。

錦 洞 天

緋碧花開映紫宸。九重臺閣四無隣。接霞樵路空啼鳥。
隔水仙家不見人。誰料風流佳境界。能開綺麗別乾坤。
紗窓錦壁塵寰外。占斷群芳萬斛春。

胡 枝 花

不護陶籬護法堂。孤先晚菊賽空王。青裙婦貌依胡國。
紫袖童身占梵場。將道華嚴迴向種。還疑覺淨薩陀粧。
沉檀一炷空爐火。默坐蘭團聽異香。

同九華雪溪翠筠夜涼散策竟到五智借楊池亭一茶一酒

雅趣有餘夜將參半始歸寓舍各有詩限庚韵余賦五首以

示同社時安政戊午仲夏二十九日

十雨連天晚漸晴。同人握手試同行。風涼五月蜂城下。
略數飛光一萬螢。後喚前響五里程。野火江村人半定。
葛衣蕉扇一般輕。山鷄睡着水鷄鳴。酒軍茶戰築詩城。此段吟聲雜笑聲。同社詩成余未就。
睡壺敲析舉煙生。

伊軋藍輿過半程。村鷄各處幾聲聲。兒夫不會儂微步。
并看飛星與亂螢。攔得涼風過舊城。城東擊柝旋天明。林泉寺裡林泉暗。
第五橋頭第五更。

蟬脫

解脫寧非過去緣。神機何更問琴絃。秋來輕羽離黃葉。
日暮枯骸委冷煙。始信心身終瘞土。誰言氣魄去歸天。
大家語默須參見。妙在靈方換骨禪。

月季花

花花不是不天真。月月紅開日日新。惟有此花開不老。
一株長占四時春。

呂洞賓

一粒粟中藏世界。半升鐺內煮山川。先生別有何奇訣。

相見黃龍却失傳。

雪中寄故人 三五七言

朝雲暗。夜月妍。煮茶吟竹下。携酒酌梅邊。雪屋圍
爐誰靜坐。空房面壁自安禪。

雪

目盡江山萬里天。詩成剡水瀾橋邊。此中有句人誰識。
當日襄陽孟浩然。

元旦

定裏如如舊轉新。天南地北一般春。霞光曙後聞啼鳥。
雪色晴來見賀賓。朽骨老梅充曆日。虛心寒竹證前因。
昇平只願閑無事。端坐蒲團保病身。

立春

金烏玉兔舊還新。漢苑回春太古春。畢竟韶光何處所。

東風第一入梅唇。

梅

除竹誰其伯仲盟。冰姿玉骨聖之清。雖然我與逋仙異。也結孤芳別有情。

春

雨

霏霏漠漠帶輕煙。淺碧深紅色麗妍。柳眼如啼含別淚。桃花似笑喚歸船。暖浮書幌宜欹枕。濕透琴床罷理絃。點滴繞簷能入夜。山僧受用伴安禪。

春

雲

水次山邊簇未開。東南冉冉曳春回。參差織出花連樹。左右圍成錦幾堆。

春

水

煙波碧浪淺深平。織得羅紋晒晚晴。雪鷺銀鷗光皓潔。

紅桃綠柳影鮮明。長江風靜細鱗動。十里雨收微暈生。畧似秦川機上錦。看來誰惹遠人情。

春

野

土脉纔融暖霧堆。原南水北認春回。綠楊陰薄始萌草。紅杏信遲猶着梅。林下道人詩幾首。店頭田父酒千杯。紛紛自怕無佳句。也被牛童笑不才。

栽

梅

處士橋邊雨始晴。芳魂帶月作同盟。容卿市店非凡物。微汝仙家亦世情。倚竹山中聊可適。品花天下定無名。自今吾舍占清賞。不用石湖湖上行。

寒

食

膏雨一晴花欲燃。芳菲恰似火連天。怪看水郭山村曉。獨有誰家不禁煙。

移花

移花莫若植江干。清影清香水面寒。今日品花梅第一。一花合作萬花看。

過富岡氏花園

賦詩不去受花嗔。且有芳園鳥雀親。尤其是清君富饒美。丹楓白李悉皆春。

新夏

節序迎花又送春。花魂飄散逐風塵。如今一轉春何去。新却榴花老却人。

春末夏初

嫩葉尖新綠漸加。春花落盡夏花斜。薰風抹破清池上。掠水將飛燕子花。

竹間雨聲

此聲堪聽不堪言。愁雨愁風灑竹繁。應想湘娥相憶淚。暗和風雨送啼痕。小院燒香坐不眠。琴唇筑舌說心禪。夜深細聽蕭條響。誰會玄中玄外玄。

過容膝菴

到此忙人亦解閑。閑人愛此水兼山。眼塵心垢清然盡。只見朝雲暮鳥還。

次容膝主人偶詠韵

小庭多白露。幽趣少紅埃。玄水擁籬逆。米山臨閣開。老君富詩句。閑客足茶杯。談笑塵間外。拈他付劫灰。

僧院種花

法苑栽培白間紅。山僧敢為愛花叢。朝開暮落君看取。只要人知色即空。

梅雨

綠樹深陰雨未晴。連朝兀坐寄幽情。細聽點滴蕭蕭裏。
 忽有青梅墜水聲。雨滴聲中仔細看。此意正無人可語。
 踈簾院外氣生寒。雨滴聲中仔細看。此意正無人可語。
 同參唯箇一蒲團。樸軒閉戶送悠悠。倘令來者如陶謝。
 午雨昏昏境自幽。推倒柴門也不愁。

賀得乘和尚從關源徙永昌

陸地波瀾不足真。着衣喫飯獨稱賓。家風盡力西來道。
 佛日增輝兩處春。設是降龍仍伏虎。何如護法更安人。
 高拈拄杖宣揚去。一丈階前草又新。

賣衣換書

萬卷仙書味有餘。何愁案外出無衣。細推ノ字思量去。

身是經中一蠹魚。

三隱詩開講

仰彌高處鑽彌堅。鐵笛橫拈動地天。聽取三師同一曲。
 此聲咄咄在機前。

白蓮

驟雨纔晴水殿涼。秋風皺浪小銀塘。佳人鏡面菱無影。
 帝子樓心月有香。誰把朱紅爭麗艷。獨將淡粉試新粧。
 嫵娥不耐蟾宮冷。却向人間嫁六郎。

高祖忌日

心身脫落聲轟地。脫落心身影逼天。試把乾坤相比見。
 中秋覺月自團圓。

防意如城

鐵壁銀山打不開。君王端坐在高臺。單刀直入他何者。

却隔重門拱手來。

守口如瓶

舌端纔動逆真言。強說禪心是禍門。縱有點頭頑石力。何如語默轉乾坤。

晚秋書懷

風聲雨氣兩相奇。一箇蒲團半格詩。天上何人催肅殺。關山落葉盡紛披。

欲雪

漠漠同雲覆水濃。寒空正欲決雌雄。因人敢問大虛意。於我能知多病功。案上展書窓更暗。爐邊具酒面仍紅。設令觀象知晴雨。詩在先天未判中。

風帆

六幅排雲水接天。波間有路杳無邊。孤檣力大何辭遠。

並馬爭馳也讓先。買客飄衣飛似鳥。篙師企脚快如仙。層臺一望歸心切。莫乃東吳萬里船。

落葉

湘瀟之北洞庭南。索寞寒林冷不堪。耳目何煩真丈室。根塵敢拂活伽藍。風前許汝無生話。月下容誰有味談。聽取飄零千萬片。此聲一一是禪參。

慈麟和尚大祥忌

正當十月已三年。涕泣燒香面拜前。落葉敲窓閑後詠。寒風徹骨夜來禪。雙眸雙淚忽垂地。一禮一聲時仰天。白鴈高飛人不見。波濤只響海門邊。

元日

羨他人事趁天時。卅五星霜誤宿思。玉兔金烏寧奈客。梅兄柳妹也應嗤。同年學侶登高閣。昔日痴僧寄一枝。

願有朋賢親厚意。吹噓使我送丹墀。

水中梅影

謂是湘君亦引愁。嫁他河伯一生休。寒粧玉骨清之聖。雪澗凌波漾不流。

菜花

春過芳枝氣色深。也將叢莖作花林。東君賣斷凡紅紫。買得田家滿地金。

春郊散策

十日都無一日閑。是花是鳥趣般般。莫嗷道者太多事。道在開花啼鳥間。日日山行又水行。三春隨處太忙生。鳥能歌舞花能笑。真是人間化樂城。自笑閑人不得閑。迷花處處入花間。尤宜日暮遊人散。

夾路花陰踏月還。

太白苔人圖

占斷長安萬斛春。吟詩飲酒樂天真。向人不說生平願。惟道如來是後身。

春晚

日脚匆忙已落暉。風前雨裏百花飛。偶然堪笑仍堪默。何敢同人說是非。野梅落盡野桃枯。魂夢尋芳入有無。別有嬌花難忍見。海棠低面要人扶。

題墨竹石

內翰傳神老可才。新枝老葉拂高臺。此君心事君知否。穿石凌雲待鳳來。

柳眼

淺碧初開立水津。乾坤俛仰獨窺春。金堤日暖方纔困。
紫禁煙濃稍已顰。雪後回瞻鴉亦熟。風前睜顧燕相親。
五株彭澤今猶古。舒白應看世上人。

梅子

功在曹軍氣更豪。萬兵解渴爲忘勞。世實多是題花客。
閑却周詩補楚騷。

佛手柑

法王持戒下西天。指月拈華影帶煙。看取開拳無一物。
等閑結印爲誰傳。

過赤巖

斷巖絕壁海門濱。浪脚高飛欲蹴人。爲問波神何所恨。
寒風凍雨惱孤身。

訪大雲得本和尚

廿年一日斷金盟。尤是多多此夜情。落葉聲前空有念。
秋風雨後話無生。吟雲吟月月相好。品水品茶茶亦清。
臨別呈君心寶鏡。照看表裏古今明。

佛祖三經開講

山頭水尾一回春。月下花前說向人。細看般般無字字。
須除耳裏眼中塵。

題陽關圖

畫作無聲亦有聲。花風柳雨幾長程。故人且盡一杯酒。
西出陽關誰竭情。

悼亡詩爲雪溪翁

嗟吁一夜萬緣空。被誘西風上月宮。去矣情存雲雨外。
歸哉夢在有無中。剩看垂髮柳枝綠。猶比笑唇花蕊紅。
惆悵幽琴今已寂。替人咽露只吟蟲。

雪中柳

楊堤十里淨無塵。酒店鈞臺色勝春。素片光浮嘶白馬。
銀枝影動駭金鱗。才人恰比仙人好。暖絮何如冷絮勻。
寄語漁翁休謾拂。詩思繫在暮江津。

雪中梅

湖山臘裏泄東風。素白爭光絕異同。冷色妍妍煙漠漠。
寒香脉脉影濛濛。誰將暖律春能發。我與冰魂意自通。
玉戲花魁成兩美。始看手段出天公。

湮槃忌

不動干戈奏凱歌。人天百萬一時和。清平付囑大家去。
枕手悠悠眠碧波。

麥浪

萬頃晴濤一望平。西疇縮地接南瀛。怪聞牧笛知何底。

無限涼聲當櫓聲。

書懷簡枕山翁

久矣八行通信難。江雲渭樹隔吟壇。歸心海北臨詩動。
別恨山東入夢寒。典雅風騷元自熟。新音古曲為誰傳。
三年各處依人問。果否平安與不安。

貧女

蠶桑紡績為他忙。擲織穿針不敢違。製就惘然何所恨。
定是隣家錦衣裳。

泥美人

始信香魂幻出身。粧成又見舊宮人。再生不語黃泉路。
淡拂娥眉媚紫宸。

讀寒山詩

閑却天台放倒顛。笑而拍手入塵廓。昔時首唱陽春曲。

今日猶傳白雪篇。人道蓬頭窮乞士。誰知黃面古金仙。
口如雲變心如月。妙按清哦更說玄。

五色牡丹

清平曲罷豈無詩。且把風姿比阿誰。非是董賢眠未覺。

即知何晏汗乾時。右白

不是姚家不魏家。朱門富貴競繁華。花欄着得緋袍立。

國色餘光映晚霞。右紅

靸紅歐碧見他憐。爭及魏家妖態妍。百寶欄前四香閣。

煙光凝處夕陽鮮。右紫

曾入仙家學道粧。灑然土德占中央。人間紫陌紅塵輩。

也合低頭拜路傍。右黃

高風一格錦堂春。肯競嬋妍媚紫宸。脂粉濃丹皆避席。

阻簾俛仰衛夫人。右綠

豫讓刺衣圖

氣逼乾坤恨逼人。廁邊橋下乃潛身。須知百練精忠劍。
刺盡千秋不義臣。

夏日山房

樂在溪山隔世寰。老僧相對碧孱顏。時時歛雨雲飛去。
處處穿花鳥倦還。風月滿懷真靜境。乾坤唯我有餘閑。
會心之地何求友。一任傍邊笑傲頑。

李白捉月圖

心在中天身在船。船中倒影水中天。知公捉月非無素。
本是天都謫降仙。

野花

雨晴雲散日西斜。淡泊秋光水一涯。曾見白蘋紅蓼外。
無名野草有名花。

秋夕

蚓笛蛩笙聲寂寂。微雲淡月影迢迢。樓頭一望秋千里。白鴈高飛過碧霄。

漁父詞

葫蘆杓酌賢人酒。舴艋舟流七里灘。小女養蠶供釣線。長男種竹作漁竿。

雪夜煮茶

活火敲冰煎石泉。寒爐擁膝坐安禪。芳茶七椀家傳術。兩腋風生骨欲仙。

賞十六夜月同水落雲玉井水鑿分字得宗

客舍中秋趣不同。知公此夜喜相逢。昨宵孰與今宵淡。前月何如後月濃。豈把盈虧論雅調。誰將顯晦較詞宗。癡心愛惜佳風景。未達殘更落米峰。
自柏崎米山當面南故云

冬日讀書

閱罷春秋算歲餘。一年三百過居諸。園林雪墜殘花盡。庭砌霜飛落葉疎。短景向窓忙理事。長宵秉燭好繙書。博山香燼日將晚。憑几悠然看碧虛。

乞畫代簡

囑君一幅古溪藤。為寫雲山碧幾層。斷岸瀑邊添片石。脩然坐此黑衣僧。

雲水

水冷雲寒帶夕曛。雲如絮帽水羅紋。雲情水意何曾隔。水態雲容自不分。漠漠濃雲籠淡水。潺潺淺水帶深雲。最憐雲水無心物。弄水瞻雲說敢勳。

水月

長江受月浪掀翻。漾漾江心蕩月魂。月窟江通光的的。

江邨月落影昏昏。鴈飛月下江三里。魚躍江濱月半門。
望月泊江篷底客。占來江月別乾坤。

四家寒夜

石泉凍合寂無聲。月色添光雪色清。最是嚴風寒冽夜。

空山但有斷猿鳴。山家

夜氣寒凝動此情。市塵誰也免營營。可憐赤脚穿冰雪。

鈴語丁東賣麵行。市家

雪撲書窓夜欲闌。尖風穿隙凜心肝。吟詩命筆且將寫。

硯水冰知天下寒。詩家

客襟如鐵被如水。寒入膏心火色凝。斷臂腰埋三尺雪。

須思半夜坐禪僧。僧家

羈窓聽蟲

孤燈一點夜將闌。促織聲中夢不安。幽意誰知歸意切。

夾衣未贖旅衣寒。催來懶婦登機上。喚起征人傍枕端。
想見幽風詩七月。思量盡處淚欄干。

訪雪溪翁

吾曹且喜遇高賢。指月停雲證宿緣。鳥語關關傳古韻。

花心脉脉引枯禪。曾言我輩非如滿。本識先生是樂天。

卿若香山移地去。清吟共老石灘邊。

歲晚書感元日記喜各四韻二章恭奉呈青松

法叔衷禪師情見千辭時文久辛酉春正月

吟雲嘯月送年光。七十平分夢一場。臥病幽栖來往斷。

孤貧落魄嘆嗟長。先春只待登東閣。後夜閑談倚北堂。

冷坐心肝碎無寸。請師為許活生方。

星移斗轉舊為新。要地閑門不引塵。柳展青眉呈瑞色。

梅開玉頰證佳辰。法王祝得無窮壽。禪客吟成不老春。

仰見東方一千里。高歌萬歲奉尊親。

祝林泉龍吟禪師壽

四面風經冲玉鶴。長江水暖泛神龜。無量壽比龜仍鶴。便是尊身不老姿。

早春書懷

東風尚被北風衝。暖雨寒風解兩絨。雪片梅花爭素色。江光柳色映青衫。鞭春日月催歸鴈。促老年華似健帆。修得閑中閑事業。禪餘舐筆拂塵凡。

北末有懷東江

誰言春風自至公。未見春光動春風。強梅弱柳渾埋雪。況又千紫與萬紅。詩依新曆懷花鳥。感入舊時思年少。君不見。江東各處。柳間梅。朱唇綠眼共良媒。又不見。江西各處。花及月。微雲淡煙兩佳絕。遙知東都

物華新。爭奈兩三吟遊人。身滯北末荒寒地。腸斷舞鶴城邊春。只願而今得奮飛力。千里一過到彼江濱。

絕句

有意看花花有淚。無心聞鳥鳥無情。機先一句誰收取。道得無生却有生。不向春風花不多。春風向處鳥相歌。須知造化天真佛。花自開時鳥自和。

豐川稻神像贊 應見龍獸乘二禪士索

內秘觀自在。外現稻荷神。須知妙智力。分影仍分身。寶珠雨玉粒。與奪接幾人。感應水中月。慈悲花外春。廣大無邊德。塵塵刹刹新。

三面大黑像贊

一面分三面。福壽自在天。金鎚兼玉軸。縱橫爲誰傳。

君知囊中物。無量又無邊。隨心乘願力。應機主化權。神通不可測。一笑一笑圓。

春日書懷

枯淡吾生亦愛春。無情景物幻中真。呵風罵雨元非妄。判白批紅未敢貧。百鳥和來菩薩偈。千花落盡夜叉嗔。細看一一華嚴法。別是心身不引塵。

涅槃忌

四十九年花濺淚。二千餘歲鳥驚心。波旬不識漫成舞。千鳥千花唱法音。

題天台山圖

曾上天台動此情。更逢此景覺神清。畫山預具真山體。併聽松聲與瀑聲。

書窓花影

翰林院外小窓隅。月寫瓊葩淡靄敷。非白非紅寧辨色。是花是影自成區。敢因能畫煩摩詰。只爲佳詩想大蘇。一刻千金誰定價。天公手段與人殊。

春郊散策

郊垌收雨忽新晴。徑路尋芳取次行。社舞村歌迎上已。錫簫牧笛報清明。截雲晚色紅交紫。隔水嬌花燕接鶯。祖道由來雖省事。春風引我漫多情。

北末春日

東風次第北風微。讀罷金書捲弊帷。柳塢煙青花未發。江邨水暖雪初晞。殘春一日聽黃鳥。五月南山歌采薇。惟爲吾曹詩癖在。杖支丁字立斜暉。雨自如酥水自融。安排化手在眸中。晴窓檢曆春將盡。冷杖尋詩興不窮。三月雪消山更白。一時花發樹渾紅。

村村此景知何是。爲問郊垞賣酒翁。

春晚書懷簡雪溪國手

料理春光好向誰。杏花開落夢相思。芳魂欲死我無藥。
物色應蘇君有匙。柳絮飄風粘小徑。鶯聲帶雨揀深枝。
家傳爲問金爐上。玉屑丹沙鍊幾詩。

夏日

脩然倚榻寫春詩。判白批紅好向誰。盡日柴門人不到。
山家正是摘茶時。

再會宗龍和尚

十年一夜語心期。嘯月吟雲物自奇。昔日情思如昨日。
遇君思做遇春思。

赤倉溫泉

靈湯浴罷曳吟筇。盛夏涼風到處從。頓足巖頭回首立。

雲吞萬仞妙高峯。

過古戰場

漫抱愁腸不耐情。登臨此處是金城。一朝敗走千年恨。
今日思尋十里營。盡矣旌旗千鼓響。已哉汗馬萬兵聲。
殘墟畫靜蒼颺走。虛谷宵寒鬼火生。水帶悲風聲咽石。
山籠殺氣月喪明。身持忠直投危急。意爭雄豪有命傾。
毅魄嘯朝親又子。衰魂結夕弟兼兄。荒邱松柏存餘地。
兩死徒傳一士名。

江天暮景

四面模糊一樣秋。蘆灣荻岸水周流。江村此處皆漁客。
釣罷歸來繫小舟。

敗天公

碎身粉骨不堪悲。長抱愁心訴阿誰。道友禪盟各懸隔。

簑衣竹杖共分離。魂殘庾嶺賦詩處。夢落桐江垂釣時。
翻想眉山歸旅日。酸風液雨得便宜。

歲晚書懷 萬延庚申

處處尋花去。年年引夢來。修禪雖不就。問道到無猜。
昔日思難料。前非悔不回。卅六方添一。明朝見笑梅。

元日書懷 文久辛酉

乾坤無大小。事序有盈虧。病馬辭金絡。良醫試玉匙。
鳥傳清世曲。梅發舊時枝。萬物皆奇色。如何使我奇。

示祖庭具壽

轉鐵成金寧有日。磨瓦作鏡竟無時。勸君更會西來意。
松柏庭前勸祖師。

文殊大士像贊

勿言是文殊。勿道非文殊。固無無文殊。豈有有文殊。

文殊問文殊。文殊答文殊。會彼文殊意。文殊真文殊。

寫懷

汗漫多年懶折腰。開花落葉信風飄。眉波逐日且難滅。
鬢雪經春猶未消。謝屐郭巾閑自在。山雲水月小逍遙。
安禪此法無人話。默坐心空轉斗杓。

送山田盤劍士

耳聞眼見總爲仇。山自高低水自流。截斷生機須靜坐。
直心影劍流動一刀頭。

不倒翁

起臥縱橫自廓然。誰言隻履越西天。去來不語王三昧。
今古忘機坐九年。轉側隨人甘寂默。低回擁膝守安禪。
須知此老真如意。到處新緣證舊緣。

盆山

孤邨草屋兩三間。短短籬門小小山。知是閑居無稅地。
敢令縣吏夜敲關。江山近遠界西東。古石新松位置工。千里誰能縮方寸。
知他昔日費長公。

雪梅便面

梅花如白雪。白雪似梅花。不辨花耶雪。香光一色斜。

次放翁贈宋道人咏三禪道人

三禪勝他四禪天。偷愛逃禪隱几前。一事空時百事全。
只紙筆墨臥雲煙。銀河之夜吟張騫。灞橋之雪寫浩然。
學海清才如深淵。丹青高手比層巔。敢與世上爭後先。
松花有食有清泉。筋骨稜稜節自堅。江山俯仰供新篇。
披襟對君如對仙。畫料詩材共精研。此心一日如一年。
一詩一畫爲我傳。

菟水先濟圖

一水橫流浪拍天。毫機卓絕後爭先。駿駒能使人偏疾。
猛將其如馬不前。勝敗論來詞賦在。毀譽併得姓名傳。
祖生功業空千古。誰復河頭競着鞭。

白蘋

讀罷周詩憶舊遊。夢迴南澗白蘋秋。西風入水吹香去。
一雨飄花引影流。潔色與蘆蒙野岸。涼光如雪滿芳洲。
憐君淡泊情誰會。只是終身伴渚鷗。

十樣錦

塞鴈來時老葉香。東籬壓菊殿秋光。文章日變紅仍紫。
錦色長看碧更黃。非是買臣歸故國。便知妃子倚宮牆。
斜陽影映欄干外。一段新粧媚曉霜。

八月開鶯

紅楓紫栗粲秋晴。不啻眸驚耳亦驚。說向城中應不信。

春山春日山故八月聽鶯聲。

美人草

玉帳佳人逐劍光。于今血淚濕紅粧。芳心不語當年事。

紫薇花

晴霞艷艷媚斜陽。一日花開百日長。試問風情誰最切。

梧桐

深陰坐暗捲簾鈎。露井重重翠欲流。一葉增時知有閨。

西風觸處易成秋。夕陽灑樹雲林喜。歸燕題詩杜牧愁。

倏忽天明仍斂影。孤雲落月挂梢頭。

達祖贊

梁王殿上抱珠歸。面壁多年淚濕衣。可老如無截臂日。

胡鬚削足悔先非。

山樊

一樹名香七里香。花凝雪色奪春光。而今問訊黃山谷。

好把雙清列兩行。

上宮太子贊

西天十號士。東地古金仙。神通不可測。種智自明圓。

萬事師萬世。教法每人傳。懲惡誅守屋。勸善主化權。

空中乘天馬。從騎取玉鞭。雲雷相送去。忽到衡山巔。

身被解脫服。手擎妙法蓮。九所建梵刹。日講內外篇。

真誠我土佛。豈比尋常賢。於戲漢明帝。騰蘭歡言詮。

騰蘭如不在。應遜上宮前。瞻仰皇太子。風神自昂然。

鎮國護帝道。密密更綿綿。真如實相面。月落不離天。

橋

誰言四皓寄閑身。玉顆香中不見人。爲問仙翁去何處。名傳世上一家春。

狐火

日落山村不見星。西東亂點碧磷生。田畦黍塢來還去。野岸江堤滅又明。風颯林間疑鬼嘯。夜淒塚畔有狐鳴。須臾焰散歸何處。兩兩三三照古城。

留別北堂兼示肉徒

東北由來夢不寧。夜堂苦對老人星。天涯有恨背萱草。國家難期鳴鶴鶴。米嶽雲寒山雪白。櫻河水暖柳煙青。而今涕淚莫輕灑。早晚歸來敲小扇。

書瑠璃殿天井

四言

煎茶癡藥。冷水溫泉。皆醫王力。換骨將仙。浴者忘

病。喫者延年。他是誰子。須觀因緣。

賦藤原氏假山水

山重石疊路斜通。曲折高低趣不窮。千尺廻巖飛瀑掛。滿園雜樹落花空。淵明植杖嘆衰柳。小杜停車詠晚風。縱有秋風紅葉好。此心恨不是春風。

慈麟和尚休廣忌

十月正當十日天。團茶手自爲君煎。龕前盤釘擊眞果。案上爐香裊細煙。雨雪同行投白水。乾坤獨步入黃泉。方今想見夢中夢。夢裏光陰過七年。

北海道中所見

北風吹雪拂愁顏。路嶮山關與水關。日午天晴滄海上。金山變作白銀山。

留別大雲得本和尚

不問名藍訪道盟。玄談徹夜惜離情。天分東北路千里。家隔海岑人獨行。瘦骨荷恩殊覺重。俗緣於我便知輕。別來爲見春風面。無舌花聲引鳥聲。

留別林泉龍吟禪師兼說所由

曳錫春山入碧岑。流年寵顧感恩深。花朝雪夜參禪話。飯後茶前問道心。祖意千般甘帶苦。玄談幾百玉和金。此行自比雲無定。何日歸來聽淨琴。

謝稱念寺主惠烏鷗羊毫

寄我以一雙之兔穎。寄我以一箇之烏鷗。多君於我情何切。爐畔案上足優遊。一杯煎茶呈道友。一紙裁詩愜左右。千月千花共同參。煮山川罷題花柳。

先師忌日拂塔 四月

夏木扶疎綠葉鮮。親拈玉樹換金蓮。傳心有此好消息。

月下雲間過杜鵑。

呈青松魯衷禪師 解入

捨舟北海上東岑。高謁尊身問佛心。願下鉗鎚時一打。縱雖鈍鐵亦成金。

筆陣

文場第一管城公。對物臨機勢自雄。逐兔馳鼠添逸氣。塗鴉縮蚓立奇功。鬼神動哭藏何處。鸞鳳飛鳴舞此中。五字三都酣戰後。毫鋒收在墨雲叢。

雨舟

柳暗雲昏雨未晴。此行不似剡中行。篙師撐棹莎衣重。汀鷺依爐羽翼輕。遠岸空濛江十里。長橋宛轉水連程。煙波一道漁家暮。敢把詩情擬釣情。

蛙鼓

枕頭眠覺夢魂驚。聽作鏡歌戰勝聲。閣閣叫空何限意。
鏜鏜震地若為情。江城月暗千軍破。野戍風淒萬陣傾。
寂寞郊居閑有味。稚圭與汝領餘生。

蛙聲

雨足中和得意鳴。天然律呂入幽清。何曾韵韵關他意。
便是般般愜我情。二頃田頭占歲熟。孤燈牖下判天明。
誰知廣樂軒轅後。別有喧闐兩部聲。

秋燕

呢喃別語不堪情。萬頃煙波幾日程。西北山連朝霧暗。
海天水合夕潮生。雙飛呼我報秋社。獨坐仰天祈雨晴。
為訂前期休背例。明年也復問柴荆。

月中桂花

玉兔拈花夜景閑。長生殿裏影斑斑。月過漢水懸松上。

香逆西風落竹間。寶斧攀枝猶未去。靈槎問樹好應還。
若參金粟如來座。向上何曾隔一關。

年內立春

時惟臘日立春天。大吉題門乃祖傳。窮鬼親參僧淡白。
歲神鎮護世豐年。空心改色竹尊者。冷笑抱香梅聖仙。
物換星移人又轉。堂中始着主人筵。

元日

天回地轉物皆和。調入新年換舊河。高唱山門無事曲。
朗吟國土太平歌。今朝淑景梅尊者。去歲韶光雪佛陀。
曉色春風一般改。東皇使我主龍窠。
龍溪山故

新柳

東風有脚渡江來。一目相看共不猜。羅漢翠眉隨意展。
至尊青眼為誰開。籠煙幾樹遮旗店。和雨長條拂釣臺。

幸避行人免攀折。歲年無恙引春催。

春燕

朱雀橋頭海國賒。歸來未敢後年華。重門曉暗迷殘雨。
細徑春幽拂落花。情比佳人樓殿裏。跡同羈客滯天涯。
榮巢到處費辛苦。猶擬舊時王謝家。

花朝俳體

柳塢花堤景奈何。休言此地隔洹河。金棺動處風聲靜。
鶴樹踈時月影多。實相身存桃李色。眞如法在燕鶯歌。
多聞不會頭陀意。百感皺眉不爲他。

栗

一夜西風失手來。皺顏皂齒向他開。懸猿貯食謀何拙。
君正含情笑不才。

小佛嶺遇祖忌賦懷

小佛嶺頭。值大佛事。越溪水流。傳相溪泊。此地武親將
閑花兼靈源。遐仰吉峰呈微意。此山之高可稱尊。此
澗之深堪比恩。天如有口替人道。祖道珍重此道存。

山村隔雨

十里三投水界山。寒風冷雨打愁顏。苦吟不就旅窓下。
孤枕身閑心不閑。

過猿嶺

將認前蹤續舊詩。樹枯秋老嘯猿悲。記曾燧石與寒水。
今日相看知不知。

歲晚

鳥飛兔走共忽忽。逐影追人歲不同。住處何論山廣狹。
移居遠隔水西東。春秋卅九暫時過。甲子周旋半夜終。
堪聽天鷄一聲語。喚催初老引春風。

元日 元治乙丑

山門左右境。儵然洗手擊香佛。祖前萬歲仰天歌。聖壽多回低頭讚金仙。三僧二僕坐高下。少女長男來後先。今日相看面相識。共將新語報新年。

祝林泉龍吟禪師壽三疊韻

曉望蜂城舊碧岑。春風浩蕩彩雲深。書傳北雁天通信。口唱南山遠寄心。道體如如堅似鐵。名譽箇箇貴於金。新章呈祝語何盡。事在石泉無操琴。

人日書懷

天日漏春灑。人日入佳期。人意符天意。昭昭共無私。雲際鴈嚙嚙。門外柳垂垂。雨綠草生處。煙橫水暖時。東風誰是主。造物皆能知。初老忽今日。一事更無爲。兔烏疾於箭。穿眼仍過眉。天脚下坂玉。人脚可敢支。

年年催花發。歲歲送人之。人自老增老。花自奇而奇。幸自身無恙。安禪坐忘飢。一鉢菜粥後。閑吟五字詩。

上巖殿山圓通閣

村回水繞遠移筇。問路邨童與野農。石佛頭邊穿徑轉。田家背後傍渠從。巖前鳳舞千竿竹。嶺半龍吟數株松。倚榻丁寧念尊咒。生生願處補陀峰。圓通閣上坐忘機。早晚靈松帶落暉。楊柳影斜菩薩體。梅花香撲野僧衣。寶堂唱咒梯階下。荆路吟詩杖屨歸。獨木橋頭回首立。巖山半被白雲圍。

詠松鶴壽錦江華甲

婆娑影動蒼山月。嘹唳聲穿紫府雲。白鶴青松何恨壽。便添左右賀多君。

盆梅

孤芳笑口喚誰同。半座分君紙帳中。細蕊穿珠欺雪色。嬌魂傍戶惹春風。逋仙得得浮煙水。月姊迢迢下碧空。此際何煩船與鶴。一聯香影在房櫳。

先師忌日拂塔 二月朔日

匝月南柯夢片時。言猶在耳每思之。多情訥舌絕言語。百事狂愚爲拙癡。天上敢煩鴻鴈信。塔前翻想鶴鴿詩。斯心莫怪花仍鳥。顧面庭階下太遲。

茶聲次山陽韻

石鼎煙籠沸沸鳴。交聞蚓笛與蛩笙。能將古韻翻新韻。大雅之音讓此聲。

月前梨花

玉妃浴罷步黃昏。影淡花魂帶月魂。宴罷歌臺人寂寂。風吹素袂過西垣。

柳園翁見寄畫山水賦之以謝

有山有水足以添幽。無秋無夏可以從遊。晚年之樂生平願。此裏悠悠百事休。先生有意能圖意。抖擻精神寄蕭寺。半日一笑默維摩。不啻忘機更忘利。

白杜鵑花

血痕洗褪白瓏明。誰道無情却有情。蜀帝歸魂謝娘怨。爲花爲鳥引虛名。

夾竹桃

桃花艷艷分容色。竹葉青青讓象形。麗質相兼紅間綠。南薰到處具涼亭。

讀三泉百絕

七字城中各策勳。有偏有正簇爲雲。西東破敵真奇將。百首詩猶百戰軍。

盆池白蓮

液園避跡出瑤池。拂落紅塵洗玉姿。淡粉敢輸醒虢國。
嬌顏須恥醉西施。風生矮榻涼香動。月上幽軒素影披。
炎夏賞芳渠第一。葉花映對碧瑤璃。

幽軒覓句次枕山翁韻

看雲笑解頤。冉冉日華移。俗意何關我。禪心或領詩。
世榮歸鄙夢。貧富付盧炊。須擲人間事。誰言沒了期。

柳圃翁題山水圖

梧桐洗罷坐微涼。日落湖光接月光。非是雲林清絕地。
便知柳圃隱栖鄉。

中秋

一顆摩尼海一方。阿誰琢出獻君王。天宮不夜明如鏡。
便是連城璧夜光。可惜清輝餘水殿。翻憐素魄屬山房。

年年愛翫許多好。此樣風光寧有常。

白秋海棠

佳人一樣白霓裳。繡佛堂前抱冷香。自謝塵緣離色界。
猶觀實相賽空王。風飄粉態舊仙女。雨洗嬌顏新嫁娘。
露坐終宵何所恨。月前低首媚秋霜。

殘柳同諸子賦分韻得東

已被霜威隕色空。無情有意夢相通。窮秋影冷湘江水。
落日聲寒灞岸風。岐路迎春停旅客。沙堤帶月送歸鴻。
人前不問榮枯事。詩在河橋寂寞中。

孤鴈

羽翼摧殘路自長。孤身一去向瀟湘。幽聲觸枕眠難穩。
別語關身意欲狂。古渡蘆枯餘隻影。寒空月落絕雙行。
鳧鷖近渚漫休笑。萬里來賓非汝儔。

萬里高飛一羽毛。倉皇獨就彼蒼號。過天有影霜初下。殘夜無聲月正高。取路今其誰誘汝。迷途早已好爲朋。塌來莫背連翩伴。蘆荻叢邊送目勞。

送獨立寮長之京師兼說所由

單厭浮榮。以了字禪。扶起巖舍。以說具編。眞箇佛心宗鐵漢。我是稱之大。才賢聲名聞天朝。紫極雙賜金杯仍。帝勅。捧下丹墀秋色妍。錦衣色暎錦楓色。

敗荷

夢想瑤池興與亡。花魂葉魄共淒涼。斷無一箇補僧被。惟有幽禽刷羽裳。蘆荻纔存多白水。芰荷已倒剩荒塘。繁華夢破寒波上。白鷺紅鴛媚夕陽。

九日喜枕山翁見訪分韻得支

楷頭倒屣揖東籬。共倚軒窓說往時。誘犬携鷄陳跡古。

評黃判白夕陽遲。多情却似無言者。高士仍同不倦師。忽得斯人何等福。上天方與訂佳期。

水仙寒菊圖

翠帶黃冠共麗妍。瀟瀟洒洒立寒煙。方今試把先賢比。漉酒巾翁捉月仙。

寒燈

寒燈一點白晶晶。青焰無聲雪有聲。半盞膏冰踈壁冷。孤根穗燼矮寮明。禪餘展軸照金字。藥裏排匙燃鐵檠。殘夜爐頭花已落。不敲棋子引幽情。

盆梅二首爲梅童和尚

夢入蘆山動此情。寒窓月上小軒明。影高瀑布三千丈。恍訝聞香不聽聲。垂枝白梅。看做紅雲更不猜。敢羨當年猗頓富。逋仙與鶴泛舟來。

珊瑚一樹萬花開。垂枝紅梅

病中作

品藥評醫未敢真。方床曲几每隨身。如今病裏觀真諦。
果證般般是宿因。忽忽歲月枕邊移。更深物定人岑寂。
微命如絲與死期。一盞殘燈照瘦姿。臥牀背月背花過。世間誰是梁鴻輩。
斗室無人奈病何。門外時聞主噫歌。

樓拂

樓欄意氣有誰知。隻手提來驗祖師。兔角低頭收語脉。
龜毛避跡失情思。倒懸紫府充三尺。橫瀉黃泉覆四維。
墜尾龍髯總凡物。乃翁勝具及癡兒。

老鶯

曾逐嬌雛出竹籬。花堤柳岸且相隨。落紅深處喉猶滑。
新綠堆邊影亦奇。春尾尋芳迷後苑。夏頭穿樹過前墀。
黃公數語我能會。應向家山求舊知。

絕句

爾來坐月能觀月。行處逢花自詠花。三萬六千縱過了。
半成困苦半咨嗟。

投瑠璃光寺賦所見以眎培心和尙

臺殿絕塵俗。石泉如鬼工。忘機離世念。換骨具仙風。
月暈沒雲際。燈花開水中。夜深閑坐久。疑是到龍宮。

團翁

左右與身輕。同心愜我情。招風般若力。翫月坐禪盟。
動靜分偏正。炎涼示死生。團圓無表裏。一柄古今明。

同梅童和尙養水天宮歸途得夾竹桃高二

尺強花十數枝酷可憐賞賦此併以咏和尚

嫩葉翠如瀟江之竹。 嫣花紅似武陵之桃。 花花葉葉呈
兩美。 能當炎日勢自豪。 靈雲一目悟已徹。 香巖一擊
迷已竭。 試見拈葉仍拈花。 手段分明誰辨說。

秋月次呂中孚春月韵

兔公上樹起栖鴉。 野際江間兩有華。 誰認詩心禪想外。
真如月照荻蘆花。

爲玄豐和尚自峴澤徙嶺雲而見囑

玄也玄之玄。 又玄衆妙門。 曾聞之老聃。 此語豈虛言。
始終之所極。 有無之所存。 五千言文字。 箇箇徹本根。
故人家國遠。 此去三千里。 南山界北山。 西水分東水。
雖然所歸同。 萬物玄之理。 周匝有絕無。 百道終如始。
固無高下際。 豈有是非邊。 朝收峴澤釣。 夕起嶺雲禪。

獨足踈兩地。 隻手支兩天。 應觀玄中妙。 須參正中偏。

九日謝瑠璃光培心和尚惠草龍珠

一瓶插菊祝重陽。 一鼎煎茶當仙方。 豈料潛龍領裏顛。
頌賜孤貧賑雲堂。 細看箇箇無稜角。 紅光紫色非尋常。
敢比虎睛馬乳陋。 惟比瑪瑙瑠璃光。 欽之焚香高拜謝。
擊之唱呪獻空王。 初訝龍躍侵法座。 終覺龍飛護禪床。
避灾無方天奈我。 登高有病路更長。 仰瞻天山秋清淡。
俯臨深潭水蒼蒼。 便悟龍珠非龍玉。 再三再四喜欲狂。
何啻吾儂獨占此。 半贈泉師一泉和尚半自嘗。

老婆王贊

拔苦地藏尊。 與樂老婆王。 一面現二面。 不祥證吉祥。
普導六趣客。 等渡三途航。 廣大慈悲願。 雙明日月光。
唱禮善男女。 永劫福無量。

銀盤盛雪

一色堆中絕異同。休言物物自瓏瓏。分明露出君看取。

明月藏鷺

冷雨寒霜染晚楓。水際天間境共忘。從來物體不曾藏。可知各有一方位。

謝青龍一泉禪師惠秋蘭一盆

形影相隨落野塘。水際天間境共忘。從來物體不曾藏。可知各有一方位。
欽之稽首默不言。欽之禮謝仰稱尊。維摩下座讓上座。
騷經一讀賦招魂。芳唇吐舌能言語。曾去鄉國迷樓處。
液園瑤池不留蹤。湘南洛北長隔楚。猶說昨投古禪林。
洗褪浮華整清襟。更參宗師頓得髓。孫子沐恩傳佛心。
家傳為問何妙密。家傳為許何靈術。會聞養花如養人。
不溼不乾宜夏日。去歲淒色生可憐。今日秀色直逼天。

磁盆移根分與我。一花一葉勝萬錢。誰言春蘭如美人。
自言秋蘭如義士。氣烈堂堂節自高。陶菊謝蓮非同比。
少室相倚證舊因。不惹一點世俗塵。吁嗟乎。蘭也德馨身亦健。長與道人比精神。

聞鴈

相呼鴈意引人情。客舍誰其感不生。縱使禪心無動着。
怯聞渠過北門聲。

窮秋書懷

跳丸不少留。忽忽促窮秋。歲月如急水。何曾有逆流。
自憐禪影瘦。世上誰言壽。仙丹固雖靈。畢竟長不久。
百年一彈指。均為北邙塵。位官何足賴。卻受閻王嘖。
耶當任他悔。日見雲變態。敢堅鐵石門。一朝忽破碎。
堪聞五噫歌。於人果如何。富貴片時夢。覺來在南柯。

回首天蕭颯。吹葉風周匝。寒鐘一聲聲。穿山落晚榻。

木人方歌

連山葉落夜蕭蕭。不道僧房好寂寥。汝說無心翻有意。禪人默了木人謠。

石女起舞

新豐古曲合無生。奏士聞人勿異情。若應天真靈妙感。何其石女舞容輕。

玄豐和尚見分贈南天燭賦此以報時長至前一日

橙黃橘綠四林疎。露菊霜楓一庭荒。萬落銷沈天冷殺。夢過春里仍秋鄉。此時故人偷禪暇。敲我樞窓報至長。賀以數枝南燭子。珊瑚赫赫揚珠光。絕勝紅花朱葉美。猶補破壁飾茅堂。對話商量今古外。拭眼悠悠瞪彼蒼。翻怯計日如計年。不問一陰復一陽。何論日脚長與短。

周旋一道同忽忙。天影人影相隨去。蹤跡不駐杳茫茫。嗟吁乎。上天上天其奈我。昏曉一如運雙行。

歲晚書懷

漏聲數罷撫吟鬚。回視先蹤夢有無。世與人寧爭富貴。天於我幾示榮枯。移星守歲心猶壯。占卜迎春病自蘇。無盡燈殘夜將白。時聞喜鵲向門呼。

過坂井氏梅園

欲賦梅花引雪猜。清香暗掠鼻端來。生平不喫三蕉葉。惟爲孤芳舉一杯。

竹醉

琅玕遠舍氣醺醺。過了端陽未夾旬。醉夢酣然唐逸士。清心瀟矣晉賢人。金莖下賜千杯酒。綠葉高擎萬個新。誰待兒孫長成遍。與君一笑訂前因。

米囊花

本是西天一種奇。四林春盡逞妍婆。孕花八月蟾同大。結果千囊粟共滋。笑靨臨風迴翠袖。嬌顏帶雨洗紅脂。有媒勸嫁幾曾嫁。真趣依僧爲女尼。

重陽菊花未發

金黃花未發。玉碧葉方鮮。可惜東籬下。如非九日天。感生今夕賞。情屬去年筵。試就芳叢問。何時會聖賢。

渡江羅漢圖贊 三五七言

真尊者。殺賊翁。豁然浮智水。游化入神通。敢待龍華三會曉。降臨佛海一場中。

題秋江晚釣圖

湘水深無際。巫山遠幾重。雲生仙洞石。橋現界天虹。樵斧穿秋色。漁舟逐晚風。沿溪呼不動。悞問畫圖中。

雪夜即目

小室推窓夜二更。天寒萬落寂無聲。玲瓏積雪晶瑩月。合射瞿曇鐵眼睛。

雪樵

雙束銀枝擔一肩。寒蓑凍笠白翩翩。冬天預作春天計。付與旗亭不換錢。

春郊散策

涉村取次踏花歸。好鳥馴人不肯飛。最是多情江上柳。青絲百尺繫麻衣。桃花村接杏花村。桃杏門門幾倒樽。未免逢花仍破戒。爲花一醉慰花魂。春賞番番去未空。引芳野外又村中。不言花謝總無跡。菜莢麥芒搖晚風。

過新梅莊和某生韵

花香亂點襲衣巾。郭外東風別一新。淡月黃昏未歸得。
素梅世界隔紅塵。

晚春

東君與人親。與君過春津。春新人自老。人老春又新。
紅嬌暫時色。緇袍轉傷神。只恨道未就。奈此雲遊身。
一瞬花忽謝。三月過三旬。杜鵑啼血處。花逐馬蹄塵。

題山居幽趣圖

草屋單丁趣自宜。山溪缺處老松垂。此間借我一弓地。
移種梅花兼柳枝。

江雪

四面同雲亂不收。仙人剪水灑寒流。六花索落銀橋外。
群鷺飛來玉渚頭。曠野微茫先欲暮。長空冷澹自如秋。

漁翁也會山陰興。錯認吾儂比子猷。

重三賦懷呈筏舟和尚

天真不晦思無邪。杏白梨紅片片斜。若使靈雲入佳境。
何曾悟道啻桃花。

鬢舍夏日作

長夏翛然興有餘。高情自比子猷居。數竿修竹供清座。
一炷沈香伴道書。時有新禽過屋背。曾無舊友問蓮除。
小寮卻勝大寮廣。巢燕穿簾斜照初。

蚓笛

蛙鼓與蟬琴。嗚嗚攪靜吟。蛩簫獨同調。帶月奏清音。

東都地震記事

銅雀臺崩餘片瓦。阿房宮燬化輕塵。不言天鑒呈衰運。
天愛仁人戒麗人。

苦哭哀鳴不忍聞。千燒萬死尤堪憫。微身幸免命天哉。
杲奈餘災猶未泯。一夜連燒幾萬家。餘殃入水及梭花。
朝來怕見又愁聽。獸骨人骸雙混沙。

雪聲

宵深碎碎夢先驚。竹樹交邊灑更清。如有如無當牖盡。
不風不雨向階鳴。耳根通曉靜中韻。眼底達觀塵外情。
就裏關心惟一事。千竿凍折響殘更。

元日鶯聲

先向東君報上春。曉音一發一年新。嬌能促柳舒青眼。
巧已呼花動絳唇。紅日黃衣元並好。宮娃閣鳳共相親。
此聲匹似賀正客。便自南隣過北隣。

新夏旅懷

到處悠悠未作家。浮蹤浪跡更天涯。河梁水迸幽情下。
旅館燈移度影斜。恨聽慈鴉兼乳燕。愁看老草又殘花。
風光日改人何改。卻為風光引嘆嗟。

訪萬慶益豐和尚不遇賦懷以待歸山

鴈語丁寧掠我行。東南拭目望歸程。馴樵瘦犬隨人影。
傍艇幽禽逐櫓聲。枕上燈花今曉思。窓前月色昨宵情。
癡心預覺師心動。時聽松門喜鶻鳴。

題谿山無盡圖

草屋臨江樹掩門。橋頭悞覓破鞋痕。漁樵不見天將晚。
宛似前程所歷村。

松濤

疑是池臺逆浪生。徐徐下榻月晶瑩。乾潮落地波無跡。
翠色揚空影有聲。孤鶴高枝和夢靜。老龍澗底拂雲清。

古人洗耳何塵垢。應聽晴濤不世情。

謁北野廟

魂托梅心體擬松。孤香翠色應春冬。千今肉暖千餘歲。丰態般般影有蹤。

風鐸銘

鏘然發之。非竹非絲。風撓之響。澹如何思。語默有則。意氣無私。夙夜不倦。共得便宜。橫說豎說。多時片時。隨緣相應。肯以自期。可聞可見。嗚嗚悉奇。滴滴東了。於他不欺。箇箇般若。於我不疑。固無大小。寧有盈虧。聲聲普導。智慧愚癡。言之無上。不可思議。言之玄外。絕妙好辭。圓通妙舌。神通妙姿。有真有假。直須參師。

過一谷

風刀雨陣不堪行。一谷之間百感生。愁聽英雄無限恨。萬兵聲變萬松聲。

謁人丸廟

晴浦波平月亦新。暮煙朝霧跡成陳。分明現出圓明影。即是斯公不變身。

悼慈麟和尚

水滸

不待華亭老子舟。堂堂獨沒境河流。越中越後界地名故云沙邊擡手叫無蒼。此意凄然令我愁。同時卻恐不同時。立作顛狂坐抱悲。縱欠人間知此想。尚應兜率有新知。

慈麟和尚大練忌

披肩贈品豈堪看。淚染紅衣遺贈三品中有緋袈裟故殊未乾。三拜起來餘感在。香雲斜掠鼻端寒。

茗花

不競春風自一奇。鏤冰爲骨雪爲姿。靈葩帶露先梅早。瑞草經霜後菊遲。野寺僧歸香滿袖。山園月上影交枝。花間好共盧同話。雅品商量夜永時。

風鈴頌

滴丁微妙法。東了說無窮。細聽深般若。空空竟不空。

茗戰

廬山水與建溪雲。意氣相爭勢不分。淡色濃香浮茗碗。踈煙細火副爐薰。急揚羽扇排中陣。時把靈芽試使君。宜矣旗槍誇銳利。睡魔一降敵千軍。

山亭春望同枕山翁鷺月師諸子分句爲韻得山

雨過虹消俯仰間。風吹法苑拂塵顏。花如錦繡慈雲靜。水帶琴絃佛日閑。霽月天明新白月。春山色美舊青山。

高僧莫厭儂還晚。口已言還意不還。

茶醉

綠雨金沙學玉川。靈芽一碗是家傳。豈拈蕉葉傾劉酒。好啜松風入趙禪。色暎雙眸心不俗。風生兩腋骨欲仙。吾曹豈敢瘞消渴。洗了塵緣又睡緣。

池塘新秋

曲池秋早抵空江。坐面南窓又北窓。綠樹踈邊風颯颯。紅蓮老處水淙淙。瘦蟬咽露涼聲小。新月沼人淡影雙。物化翛然二更夜。裁詩幾度剪殘缸。

長國覺巖和尚次賀大雲慧仙和尚法幢韻

以謝巖和尚正法眼藏提唱時安政丁巳雨安居日

憐兒說話老婆心。細誼精言貴似金。換骨靈方何讓古。頭神妙術不疑今。聲前識病除禪病。見外垂箴辨祖箴。

堪笑寒山携拾得。好師共入洞門深。

水聲

一脈幽溪繞小樓。塵心洗却引清愁。脩然不寐秋眠夜。

聽盡寒泉咽石流。

殘晝

幾疊層巒幾疊溪。煙雲斷續路高低。危橋峙處水無跡。

破屋傾邊人有栖。雨滴膠山深樹暗。風生絹海晚舟迷。

誰將好手補斯景。花欲亂飛禽欲啼。

溪村隔雪

千山一白路茫然。疑是壺中別有天。宛似僧堂如此夜。

修禪學道不曾眠。

雪中訪梅

孤山庾嶺路崎嶇。一白平頭見欲無。許裏誰分香與色。

寒簑雪笠立如愚。

木筆

品柳題梅寫碧空。絕勝翰苑管城公。棗心蘭蕊元相異。

兔穎羊毛竟不同。香雨灑時含嫩紫。彩霞蒸處抹輕紅。

誰言製巧東君手。現出天然造化工。

影

坐則坐兮行則行。百年抵死喚無聲。翻宜道友可禪友。

默作同參勲盡情。

梅菴夜坐

大梅莊裏小禪菴。靜坐聞香月下參。如使吾曹似迦葉。

見花不笑笑瞿曇。

賀玄輪和尚任寮長

靈禽羽化出樊籠。大講堂中唱祖風。長短文詩收巨腹。

古今典籍入雙瞳。已知名翼搏西海。豐後人故旋見德華輝日東。龍象歸如赴壑水。爲欽覺舍得宗雄。

雲寮坐雨

雲寮坐雨客魂消。丙夜燒香伴寂寥。此際宜詩又宜畫。梧桐墜滴打芭蕉。

雨中荷花

點點芳沾十頃塘。多情翠蓋擁紅妝。寄言神女休檀妬。非是佳人即六郎。

燕子花

紫宸舞罷下歌臺。水面凝粧晚不回。問是佳人待誰氏。應迎在五夜遊來。

綠陰

四顧無花一院幽。深林五月氣如秋。蕉窓雨暗梅初熟。

柳塢風晴麥已收。漠漠青陰遮古寺。重重翠色壓高樓。山僧定起經行去。時有村鷄叫樹頭。雜樹蒼蒼綠已成。新梢暎日色鮮明。半天遮暑葉惟暗。方地引涼苔毯清。竹外尋花迷蛺蝶。梅陰對客頓棋枰。叢林更好移禪榻。靜坐時聞墜果聲。

飯罷碾茶

午影纔移院更幽。燒香洗鉢坐悠悠。山童不似山僧懶。苦釀芳茶問趙州。

雲寮偶成

偶然下榻步青苔。心欲言詩口懶開。還是釣簾坐沈默。一雙語燕拂衣來。

荷珠

赴涼移榻雨餘看。翠蓋重重露色寒。月轉明明仍的的。

風來碎碎又團團。池臺宴罷遺簪在。夜岸船歸雜珮殘。疑是天仙上天去。杯盤狼藉未曾乾。

溪山琴客圖

此去仙山路幾程。孤琴杳帶石泉聲。堪聞一曲無生韻。不上絲桐兩指情。

杜少陵圖

長安城外曲江頭。春色雖好奈多愁。百回沉醉悲不盡。日把朝衣典酒樓。黃鳥白鳥接翅去。桃花楊花掠水流。此時北馬嘶隴上。鏗鏘震地響未休。不知誰識三大賦。一身萬里落蜀州。君不見。芙蓉別殿無人住。龍武新軍輦難留。東阡西陌人皆散。蕭條滿目春如秋。

螢火

腐草微光忽地生。流輝旋見勢縱橫。層臺燭散高仍下。

遠塞星飛翳又明。的的穿花殊有彩。深深入竹總無聲。翻然一簇憐貧士。照我書窓代短檠。

同九華雪溪翠筠夜涼散策竟到五智借榻池亭一茶一酒雅趣有

餘夜將參半始歸寓舍各有詩限庚韵時安政戊午仲夏

雨正晴時氣亦晴。偶然向晚出柴荆。纔過郭外多奇賞。斜日紅榴暎水明。

牽牛花

帶露披霞側綺櫺。天機札札錦重重。家人欲學廉纖手。

機屋

曉把金梭問玉容。朝朝帶醉捧天杯。勸公織女望期待。問是因何謫隨來。銀漢乘槎應速回。

星晨

楓醉

一抹林霞向晚橫。併看紫艷與紅明。素娥臨處偏嫌冷。

青女來時似帶醒。詞客停車塵外賞。將軍衣錦夢中榮。甜然旬日非千日。玄石何曾解此情。

新夏

時序迎花又送春。此生冉冉逐風塵。向花懶問天何我。新却榴君老却人。

荅人所問

死後蓮臺於我恐。生前嶮路每人危。以其石火電光命。寧願三祇成佛期。

永祖忌日

心身脫落聲轟地。脫落心身影逼天。試將景物好相比。蘆花桂月圓又研。

盆山歌

萬壑千巖連寸眸。飛湍瀑流收半掬。中有瀟湘多少景。

縮之盈尺慰幽獨。晴見殘月翠嵐橫。晚聞鐘聲傳鴈聲。斜照懸山帆貼岸。也遭雨雪傷羈情。一盆地萬里天。寒生水暖帶煙。誰界陰陽分昏曉。豆人不動形如仙。

雪

剪水飛花白作堆。纔看玉樹飾銀臺。北林有響知應竹。南澗流香定是梅。宋代逋仙高唱去。晉時王大朗吟來。禪心別有通消息。韵客推門打不開。霏霏片片逐風狂。度水飄林闕夕陽。大地皚皚銷紫綠。虛空澹澹失昏黃。栖鴉亂噪前無路。宿鷺飛鳴下有塘。奇景誰能縮方寸。兔毫收得入詩囊。縱存慧可難禪業。冷白寒光月不如。寒窓冷坐我憐渠。表豐擊壤古風餘。影照孫康苦讀書。呈瑞剪花新詠後。更深病骨眠難忍。側臥爐頭煮木魚。

除夕書懷

歲尾今宵看欲盡。年新明日便應催。春從子後空中改。臘向寅前暗裏迴。卅四忽忽移夢去。光陰寸寸逼人來。此生百事多繆錯。慙我心癡被笑梅。

春郊散策

偶下雲堂野色研。是花是鳥趣般般。僧郎不準劉郎意。飽賞風光帶月還。我與青蓮不事君。迷花處處醉醺醺。郊村好勝長安好。好把新詩換古文。嬾問空王默仰天。花猶紫白氣通玄。會心畢竟招誰說。呼起靈雲訂悟禪。示道禪首座。道有西東空萬事。禪無內外絕千般。勸君會取禪兼道。

冬日炎蒸夏日寒。

讀天童斷壁

花心鳥語月團團。織作天機日未殘。萬古無人能定價。金梭玉線與他看。

鴈

鴈鴈聲中護節回。閑僧袖手倚空臺。破雲月照瀟湘上。學字人翻學畫來。

客中作

有人無所住。友月幾年年。來往不棄我。又見月光圓。昨賞東江月。今吟北海天。顧身仍憐影。照心坐月前。曉送殘月行。暮迎新月宿。勿道月無情。千里同相逐。時發柢園家。或投騷人席。還問今夜月。明年何處客。

禪誦餘問 五詩

禪誦有餘間。偶閱古人書。般般玄之妙。情思說無餘。
 豈唯人感激。鬼神亦病諸。天真有所適。拍手意豁如。
 餘間生遠思。時望東南濶。萬籟冷蕭蕭。千山青刺刺。
 此心得誰同。耳目俱了脫。不關佛祖機。我命能自活。
 禪誦之交參。壺天月周圓。得之誦以誦。得之禪以禪。
 誦則除識見。禪則離正偏。修證雙行處。豈敢地隔天。
 坐來禪也誦。細說無說說。竦身懶打空。開口見其舌。
 一義休問他。帝意竟不契。我心我能參。將金豈博鐵。
 餘間有禪誦。經行便得宜。坐石喝雲起。傍流看水隨。
 維秋天收雨。未及葉落時。禪觀兼誦觀。真觀說向誰。

十六夜月

彼處相宜是處宜。何論顯晦與盈虧。吾家料理無人味。
 世上任他話合離。

李白捉月圖

采石磯頭老酒仙。披雲捉月水中天。知公在世原無意。
 倒上寒宮覺醉眠。

雪夜煮茶

槽拙燒頭煮白泉。湯聲沸沸伴心禪。誰知雪案茗爐客。
 枉擬當年盧玉川。

海晏寺觀楓

十月山如然。半天落霞紅。轉車運林麓。殘暉帶晚楓。
 入門古禪寂。莊嚴飾梵宮。便是華藏界。身疑頓騰空。
 拜廟祈烈祖。撫樹欽遺風。昇平陌餘歲。自古于今隆。
 方袍雖圓頂。各蒙素爵崇。光榮輝草木。恩澤濕蟄蟲。
 况於黎庶士。猶餘物外躬。燒葉休煖酒。煎茶趣誰同。
 秋色勝春色。葉濃過花濃。勿言三月好。花乎一時叢。

紛紛煩脂粉。使人醉西東。吾生憐淡薄。淡景心相通。
與其春風力。孰與秋風功。葉葉鮮如錦。千秋興不窮。
一吟題一葉。收存照灼中。

櫻花

彩雲深護紫宸春。一笑龍顏寵賞新。光被禁園花愈艷。
色香併得見天真。

栽松

栽松道者彼何人。懶問三祇百劫春。不許再煩周氏女。
今之親勝後之親。

登辨天巖

我與漁翁作同參。浦上遐瞻海上岑。欸乃移舟搖搖去。
袈裟結足細細吟。清風吹帆達巖畔。繫纜巖痕上巖嶽。
天女尊者共應現。功德深於海心深。情思欲言口已噤。

不起一念觀古今。拍岸潮傳金錫響。泛波禽和琵琶音。
如此法門常難會。如此靈境常難尋。作之無垢清淨界。
作之有緣寶樹林。吁嗟日落天將暮。山光雲影水紫金。
歸歟歸歟歸未得。倏忽海枯夕陽沈。

祝林泉龍吟禪師壽

文久癸亥正月元旦

福海彌深壽嶺高。龜身鶴骨自鸞鷲。尊堂爲祝非人事。
白羽翻來曳綠毛。

郊行

閱盡花新又葉新。出關生景適情真。此行不假老馬智。
問路漁翁兼野人。

市川渡上遇宗巖禪者

孤舟共渡市川頭。不語新遊語舊遊。須想黃龍南老語。
夙緣切莫付悠悠。

住源昌寺作

有梧有竹有清泉。鳳子棲來過去緣。不識前身修底福。
 身存現在坐安禪。境近塵街趣亦幽。獨園祇樹入深秋。坐來默記小窓雨。
 檐滴替人翻話頭。有松花食有荷衣。豈敢論他是與非。足矣百年衣食住。
 身心護法仰三歸。

皓臺傳翁老師見寄佳章次尊韻呈閣下

再會難期海界山。何圖臘裏有遊還。連朝笑話情如舊。
 九白星霜鬢已斑。俗意空來參祖意。奴顏洗去拜龍顏。
 默而不語天開口。言在寒松雪竹間。

見寄再韵恩情殊厚感佩有餘次尊韻說鄙懷欽送乘輿

留師半月萬年山。請命乘輿去欲還。有恨難酬思切切。

餘情不語淚斑斑。此心此別惱痴子。何日何年瞻聖顏。
 瓊浦從今路非遠。傳書鴈在暖寒間。

奉青松魯衷禪師 文久甲子正月元旦

請命荷恩重瘦肩。時惟法歲已周圓。陽春瑞色將何祝。

依舊青松_{寺號}聳萬年_{山號}。

眼 鏡

齒耳雙踈目欲盲。憑君一事補勞生。稚童笑指眼添眼。
 老衲愁看明不明。文字纖毫分點畫。主賓數着照棋枰。
 自今何借翳睛術。翻向瞳睛張鬼睛。

春 雪

四顧花開白渺漫。詩人袖手凭闌干。風吹柳絮全非絮。
 雪壓林丹已換丹。半夜君來分冷暖。三竿日上覺春寒。
 稔年縱有稼雲好。其奈東皇摧肺肝。

掃晴娘

懶依觀象問晴陰。默有佳人報早霖。影動斜窓風颯颯。魂歸正體月沈沈。生來不願朝天面。暗記能知夜雨心。凝態含情應嫁我。也將破戒弄痴吟。

奉賀曹源大和尚住吉祥院

略收衣鉢發東天。南紀移船住海巖。獅子巖號山高獅子勢。吉祥草輭吉祥禪。三關以外等施法。一位兼中能主權。默祝曹溪伶俐漢。圓通眼自法源傳。

觀蓮

暮賞朝觀不憚煩。霄深月下又敲門。湖邊卓杖肅然拜。水陸叢中花獨尊。十里湖天卷地開。非是華山仙客境。紅雲引接翠煙堆。便知鷺嶺法王臺。

端午

冠纓懶洗坐如愚。想見當年閩太夫。吟斷汨羅江上外。默默孤對富春圖。

所見

十雨新晴旭日紅。山村物色接輿中。晚來記取桑麻際。吹雪薺花落後風。

慶應戊辰元日

紫殿雲車載月回。還推玉輦上瑤臺。天門曉發堯神力。地脉陽生舜聖才。翠帶輕煙河畔柳。青萌暖靄石頭苔。一朝萬象皆春氣。知是春含造物來。

論書歌寄淳公

君不見。吾雖不善書。曉書莫如我。苟能通其意。常謂不學可。此言聞之老東坡。邇來於我奈他何。細推

其理觀其旨。曉書善書實無多。」上乘達者今有幾。四海茫茫待誰語。不學得之彼何人。學而不成多棄去。」欽君於書妙入神。不以人比以天倫。怒張剛辱兼體勢。深探淵源極要津。」嗟吁乎。義獻鐘張古書聖。然能所得皆天性。」鶴游鴻戲舒天文。龍跳虎臥捲風雲。」豈論漢魏兼唐晉。所貴閑雅風骨峻。韓幹江都如畫馬。不肥不瘦寫神駿。嗟余欲學筆無因。心知動靜將並進。」磊落塗鴉亦一體。我頗愛醜殆憎妍。宛如垢面嫌清面。一鏡雙鈎明了然。流麗還他非我物。風神脫落從天傳。」

遷鶯賀人

春明門外認新鶯。倏忽喬遷恰恰鳴。聽與短衫長鉢士。此聲不是昨年聲。

賽箭弓稻魂廟短歌一篇以扁堂上兼示諸子

一箭放一弓。千山射萬水。所向重重無不中。貫蝨穿虎兒戲耳。」神勅用正不用邪。將降他魔降自魔。誰祈佛陀又菩薩。敢恐夜叉更提婆。」天之性地之靈。魂通氣魄達情。不願明了人賞罰。分影分身感至誠。」

春雨六言

暖煙帶水纏山。輕雨催花促柳。灑牖幽聲雅琴。繞簷細滴詩友。陽和潤澤之雨。日色氤氳好春。均滋翠麥芳草。偏賜黎民逸人。熟眠不覺天晚。和氣應知雨心。靜對朧朧月影。閑吟漠漠花陰。

淳公贈書賦懷以報

雲翰自天降。焚沐起看之。上有平安字。淋漓墨痕滋。

蹈舞何以表。頓忘宋玉悲。啓緘再四讀。恩意及吾癡。
 夸言雖不中。厚誼情可嬉。中見公近况。清福之所爲。
 無一以不具。是皆理攸宜。然其至德大。天賜丈人師。
 終聞真實相。得失有參差。豈論他長短。苦苦說陵夷。
 心嫌小乘醉。口忌妄味辭。襄陽山簡輩。昏昏醉習池。
 賈誼屈原徒。昭昭聖得知。堪笑杜陵叟。八子歌一詩。
 常同大乘酒。風流說情思。嗟余雖不飲。陶也共追隨。
 愛蓮還愛菊。面面展雙眉。結社絕俗輩。斷橋謝文移。
 逃禪居物外。除君又向誰。

書

懷

前橋太守上干
京洛有感賦此

教禪律上病衰翁。起與孫吳督大空。本是胡僧關塞外。
 來遊此土憶斯公。

春

雪

野杏山桃興奈何。花朝一日半春過。晚來飛雪欺梅片。
 飛自松坡過竹坡。還欺暖絮渡溪橋。風收淺夜輕粘樹。
 晝雪紛紛着地消。挑訝梨花月下飄。

方

室

丈方丈室絕纖埃。敢比維摩獨默來。分座西天美人外。
 更容陶謝老莊才。

老

將

詞

挑燈拔劍嘆衰生。誰與吾人共此情。身骨雖然隨朽腐。
 也期爲國竭忠誠。

瓶

櫻

莫笑僧郎愛美人。遷鶯隔牖喚芳唇。如何錦洞天仙意。
 一樹花含萬樹春。

憶東台花疊韻戊辰之作

昨在東都過東台。彼岸櫻花幾層堆。美人才子爭綺樹。
言是煙霞凝不開。佛界變爲仙世界。眞成此處便蓬萊。
上有錦羽和歌轉。下有金鱗傍人來。六六院環法王殿。
重重花映寶樓臺。夢思吟想此時節。長詩短文費計裁。
嗟吁乎。今歲花開滿山寂。一朝萬點空塵埃。生各有
窮豈花耳。觀之念之轉餘哀。花正盡頭松正變。榮枯
一瞬何足駭。有時自天降聖才。能令芳魂發意氣。仰
空撫樹空低徊。

贈惠仙老禪

談禪已惡况談經。脫灑無言有性靈。神骨風姿誰與比。
寒公日用馬師齡。

絕句爲海量僧囑兼送其行

天桂披雲茅店月。嶺梅度水石橋風。休言淺季無師友。
法具春秋造化中。

再讀蘇詩

好詩亦惡韻。惡韻亦好詩。公之得意處。非他能所知。
波瀾卷雲起。林樹帶風悲。龍蛇與猛虎。毫鋒不可支。
超然卓絕氣。才大擬阿誰。情思凌元亮。豪放駕退之。
李杜偏胷臆。句句皆奇奇。一言或半語。文章公不私。
自然欠雕琢。直與造化期。於茲築騷壇。能開萬世基。
一副紅鑪鞴。金鍊投鑄治。千磨仍百練。學者共追隨。
山谷淮海徒。吟旆靡四維。譬猶今詩客。漸窺公藩籬。
倏忽過門外。半面不見師。爭知眞實相。捉影且費思。
精神全不會。等閑說丰姿。將學公之學。要須學毗尼。
心能空萬事。身能住無爲。親具詩禪眼。下筆皆好辭。

何敢論好惡。箇箇得其宜。言之達道士。嗟呼奈我衰。

靈隱居作

鴻燕雙雙去復來。一身無伴引餘哀。西流落日東流水。暗掠吾人竟不回。朝市雲林兩不論。觀花觀月坐幽軒。要言至道天攸命。此道存從彼道存。出家遁世分攸宜。只恐門風日日衰。隱約同參青銜老。甘禪背彼帝王師。但爲文詩覺小忙。一室幽閑人事少。功名富貴老相忘。暫要我業補萊唐。始悟雲情適我吟。行無異念住無心。仰天默了香消了。身落誰家祇樹林。

受業道器老和尚忌日

夢乎夢過卅餘年。無影無蹤事惘然。遙自那邊看這畔。白雲紅葉在機前。

記事

噫我悲吟不爲貧。西東恐見滿城塵。何當覺得希夷睡。大笑同看闔國春。

悼詞爲玉環智鏡大姊

金椎擊破玉連環。含笑悠悠謝使還。秦國何如齊國智。自磨寶鏡照心顏。萬嶂無雲山白白。千江有月水明明。夜猿寒鳥何情意。巖上河頭抱柳鳴。

成道會

何心度嶺苦脩禪。忽被寒星破玉顏。撥起眉毛須覘見。如今雪白鎮西山。

溪漁釣罷渡禪河。問道山樵失棹歌。久矣歸來何所見。扁舟載月截清波。

詠史

雲臺睡夢小仙遊。喚不回頭意自悠。聽否營中天下事。起來笑倒墜驢頭。

苦寒行 長短句

西山白北林黑。東臯雪南澗冰。風刀截雲吹石裂。天關柱折月殿崩。斯時鷹眼流血淚。軍馬麾兵劒氣騰。凜冽風罷中夜寂。猶加寒威一段層。此夜此寒天奈汝。枕榻不眠獨守燈。嗟吁乎。苦哉寒行者誰某。東戰西討戍卒走。鼓角震地仍動天。牙矛隊伍擁前後。忽然炮聲山谷破。可憐萬兵死一手。魂魄升沉了歸空。此恨綿綿長不朽。荒原草墊屍曝霜。化為寒鬼銜刁斗。

年內立春

笑看梅花默觀虛。寒云盡矣歲云徂。春風有脚來何處。且對濂溪太極圖。

慶應丁卯元日

東來五見歲華新。雖喜迎春怕送春。願與青松萬年樹。一齋健在比精神。於人別別奈參差。柳舒青眼梅紅臉。瓦解冰消自有時。令我如何共不奇。隨緣到處被他憐。至誠若合神祇意。仰拜東皇坐問焉。洞海和尚四句厄年來需其詩余亦祈之故云少僧老僕對踈梅。俱舉屠蘇祝一杯。人隔狂愚天不隔。小寮亦有大春來。先祝新正喜美名。福壽平分如賜我。小盆高飾幾金英。

應分壽字補殘生。

小弟道圓贖福壽草
求余題詠賦此以誌

春夜

靜下繩床夜色妍。廊腰帶月被花牽。歸來小室疏梅影。也寫天真示老禪。

涅槃忌

說了空華示幻華。言猶在耳不曾差。霽潭影冷雙林月。雲樹香蒸彼岸花。法子王孫彈墜淚。靈禽猛獸倒平沙。涅槃一會今猶古。風水哀鳴引嘆嗟。

碧桃數枝七右一篇併以寄枕山翁

淡于穠梨白于梅。昨雨帶雲自天台。笑向癡子說情意。竊避仙郎為詩來。慙我禪餘無隻字。天天藜藜未敢記。強擬開口卻差過。默觀色空呈心事。此去三橋有灑堂。主人能句又能章。吹噓送君以良僕。到了應為飾詞場。

一片真心對花問。太嫌嬌紅艷紫氣。芳顏如雪不掩塵。自具清容世外貴。君不見。玄都武陵金谷春。丰態欲均色不均。一種此花清且雅。不倚秦人媚騷人。

重三喜青龍泉師携茶訪余傳叟

桃李園寬絕俗埃。方欣趙老鬪茶來。茅堂亦有蘭亭趣。只欠佳詩與罰杯。

春寒再雪寫懷

小院焚香試點茶。時聞雨雪撲窓紗。上天有意人無恨。應為東君惜後花。

貫道和尚見寄海棠數枝求余題詠賦此戲贈

知是花魂是月娥。葉眉芳頰惱維摩。曾逢老杜不相嫁。卻媚僧伽寧憚他。

詠落花眎道友

梅妃柳妹競嬌色。雨刃風刀鑿麗人。長受榮華天不許。妍花忽被夜叉嗔。

觀樹和尚見餉新茶賦此鳴謝

新茶於我如故人。詩閣禪榻自相親。况得高僧自親撰。再拜擎以喜津津。時參爐鼎聽松雨。靜啜乳香入仙神。七碗殆勝千杯酒。此味爭知劉伯倫。吁嗟乎。丁蔡龍團寧可比。只比建安武夷春。

春夏交書懷

春歸客去畫蕭蕭。閨寂鉤窓坐小寮。新夏尤欣得新友。

洛陽花又美人蕉。

小弟無丁及福次郎携兩盆花來請余詩

同恭淳師次坡公縱筆韵席上賦懷

嗟予老矣自稱翁。曾悞定禪違祖風。半日對他無一語。醜顏非酒儘生紅。

高閑曳杖岸烏巾。路取溪灣役幻身。併見浮雲流水意。一般截斷屬何人。

米價連年貴似珠。貧生信有又隨無。塵間此道早須計。

祖苑松花渠與吾。

次香巖大師示衆之韵示嶺南和尚

誤逐浮榮役幻身。不知我亦塚中塵。一朝夢覺無奇特。誰認禪人作定人。

贊神應惠雲和尚真

的嗣貫道和尚囑

復古正脈。四十四傳。聯芳續焰。拔地支天。的的相承至八代。箇箇任運住三巔。枯木花開長時護法。猿鶴鳴斷靜處參禪。家風密密兮梅傳黃鳥。實相綿綿兮柳鎖青煙。

茗花

蘭生幽谷。被風誘為香識梅發歲寒。遭雪憐將此逋仙兼楚客。便邀陸子競清妍。

月下聞桂思恭淳和尚

天上懸月知幾時。地上移桂來者誰。白兔黃花原一樣。夜夜相隨照相思。宛如玉鏡臨金闕。清輝映對清香發。欲問素娥之心情。其奈更殘影將沒。此花此月秋復春。不比人生易委塵。直從徐庾編排起。畢竟清艷不嫌貧。

未開芭蕉

中心略有大書銜。不識誰知定不凡。應有相思題幾字。曉來幽處好開緘。

中秋書懷寄枕山翁

遙寫素懷寄熙堂。江上今夜若爲情。淒雨蕭蕭雲漠漠。但有蘆花雪色明。山中禪和光不昧。先打天月磨心月。

時與鏡清訂滴聲。坐向藥山留笑喝。先生吟就雨月詩。詩句驚人惹人思。嗟我索居江山隔。誰能爲我傳清詞。

吾心似秋月

吾心似秋月。勿言月似心。心清水無跡。月明樹有陰。寒山何說了。汗漫放顛吟。心固無障礙。月每藏雲霧。箇心無物比。萬象被他侵。世人如相問。笑荅鐵非金。

觀樹和尚來訪

來訪無人境太幽。袈裟慰我且遲留。青龍白虎黃龍餅。更聽松聲舊話頭。

假山歌

積年泉接石。經月柳連梅。此裏大觀在重臺。回阪橫舟作追陪。壯哉主人撐天力。略探奇蹤捲地來。三里今應論萬里。中有廬山與湘水。半江半陸路盤旋。登

彼高崗觀其美。吾畫此圖贈右軍。將壓蘭亭之記文。又令王勃作題序。敗他滕閣更榮勳。

山房夜坐

月挂前門第幾峰。風號後嶺萬長松。方今月落風還死。併絕迷途覺路蹤。

有所思賦此寄得本和尚

有所思焚香。高堂遐相望。冉冉雲流銀漢間。妍妍月落禪榻上。今年非去年。已是五年強。曾歌月下別。每抱月中傷。君不知。藥嶠笑一笑。見者盲了聽者聾。分明一聲一輪月。揚古輝今證圓通。翻身一路君觀破。夜夜光騰雙眼中。

贈鷺月和尙

君不見。鷺翼如雲搏風起。直入滄溟極涯淡。飽餐猶

能捉龍蛇。仰天擊水三千里。又不見。蝶翅飄零草野秋。形骸委霜不自由。纔承沍露濕微命。此物惆悵稍堪愁。誰與大鷗相可的。唾手竦身唯感激。忽然鷗化對君言。超然卓絕渾難敵。吾曹小蝶何足論。唯翻短羽繞荒園。低回時觸山蜂毒。去投荆棘欲消魂。嗟吁乎。天惜君材未出世。深罩煙霞秘蘭桂。猿鶴不能共此情。鷺鳳不能同此契。蝶也鷗也皆避蹤。君之慧力寧可計。

高閑和尚見贈芳菊

維秋十月晦。三徑就荒矣。蘭無秀兮菊無芳。與我成趣孤松耳。南窓下曝背。東臯上放眸。鳥忘還不倦。雲繞岫爲忙。歸去來晨光影將西。盤桓曳杖不迷途。徐沿溪流以自嘯。便眄庭柯以自娛。實非誣靖節。豈

羨他才哲。樂泉石朗吟。撫琴書歡悅。田園未有事。悠悠坐守拙。門雖設而不常關。忽然客來喚癡仙。一叢此花從栗里。半信半疑起問焉。花無語言但呈笑。也訝來者誤愚禪。不知此物是何報。不識於吾有何緣。

寄贈禪盥

推倒禪林恨頓忘。灑然結手打空王。五千經卷孤圓月。那箇心身一炷香。本地風光非冒昧。從來面目叵深藏。方今破卻冬瓜印。擔水荷柴上法堂。

初平牧羊圖

去入華山亦苦辛。餐霞嚼石養精神。與其叱叱仙家術。爭奈隨兄事老親。

杪冬絕句

林巒木落憐山瘦。澗水冰生想石寒。別有吾家成趣者。

龍松鳳竹綠旃檀。

幽居

月斧風斤了考槃。庭中景物未闌殘。長松色帶凌雲氣。破竹聲衝積雪寒。嶺上猿啼知境靜。林間鶴唳覺心寬。這般道味加禪味。真味令誰作飽餐。

投龍穩寺有感作歌

短日期長程。邨邨沿澗水。雲埋崑樹沒馬頭。鳥隔斷橋呼寒士。牧牛樵犬馱薪歸。前度劉郎傍門扉。草木變衰泉石是。臺殿依稀老僧非。今夜月昨年花。半堪恨半堪嗟。翻問神龍神變力。何當猛虎制毒蛇。

寒月

寒穿石地抽霜柱。月脫冰壺落水宮。縱是無心捨身客。奈遭凍殺此衰躬。

春晚所見

輕風嫋嫋柳毵毵。雨霽吟行里兩三。絕勝煙光暮山色。紫藤浮影水如藍。

快雨

快雨森森濺小臺。南山之麓殷其雷。天公亦解野農意。纔插新秧行水來。

螢

稻花深處避炎蒸。野寺宵行向老僧。似厭書窓無用字。高飛去伴塔中燈。

驟雨

憶著東坡老酒仙。黑雲翻墨抹青天。山樓雨是湖樓雨。便擬跳珠亂入船。

夏日即事

雲霽湖光逸興多。釣魚歌又采蓮歌。鳴雷一去天如拭。大雨能驅大暑過。

書懷示同社諸子

雲流嶺頂月懸空。昏曉無蹤西又東。行路之難行不得。逆浪翻天道不通。獨抱寶函迷深谷。掘地飲水伴猿鹿。

寫懷贈啓要師

吾道陵夷事奈何。一人難挽萬頽波。寄言選佛場中子。試聽南山白石歌。

待秋六言

待秋不爲驅暑。只恐觀書後時。芸牕細數桐葉。織月先懸瘦枝。炎炎昨似燒空。忽地涼侵瘦骨。坐來抽得毛詩。讀到幽風七月。

起見羅雲復疊。坐聽細雨廉纖。好是先秋十日。新涼半入疎簾。

寄題草花園

愛此佳人澹澹妝。舞風袖裏漏幽香。三秋七種叢叢艷。除卻洲蘆是海棠。

殘炎

暑穉炎威甚。昨昨惱此身。生憎秋老虎。奮起欲戕人。炎威不可當。觸者命將亡。願得風涼賜。平分及四方。少暉今何在。炎炎石作灰。觀其有時變。人倚妙高臺。

七夕感懷

乞巧何如守拙奇。林間月落雨催詩。天孫自在雲之上。地下人情那得知。

寄題龍頂骨爲金戒光明金龜道者定圓師屬

龍頭骨格狀嶮峒。月落雲潭膽自寒。真箇靈能須愛護。有時變化上天壇。

閑居書懷示諸同友

四顧無花興有餘。或山或水伍樵漁。莫言草野無麟鳳。應是天家結網踈。

山莊月夜

一弓之地竹栽梅。澹澹踈踈美色開。始覺天公靈妙手。玉花个葉印窓來。

過廢院

寂寂山寒澗結冰。苔碑石佛倒溝塍。可憐破壁荒臺上。時有孤猿吊古僧。

訪某僧不遇

纔入門來興轉幽。給園祇樹未凋秋。丹心擬問安禪旨。

壁上胡僧笑點頭。

投山寺

驛路風寒北馬嘶。長亭短景日將西。行尋曲逕投香界。淡月閒雲作伴棲。

投香林寺

月落山幽古殿深。驚聞鳳嘯又龍吟。朝來始覺夜來韻。便是松篁傳雅音。

投源勝院觀蘆舟達摩圖

來上梁臺說定禪。泛舟楊水破寒煙。廓然不識重重錯。雲在西山月在天。

至日鶯聲

線影纔添暖已移。綿蠻鳥囀立南枝。縱令風曆次龍歲。節至羲和生化兒。

再投源勝院對蘆舟達摩圖

此老無言最有功。輕舟泛泛水溶溶。東來問著西來意。不制魚蝦制毒龍。

掃葉

一葉纔飛減卻秋。風飄萬點使人愁。山僮不會山僧意。掃了紅黃奈白頭。

癸酉陰曆一日

癸酉年一日。神武昔即位。正是極吉辰。仰天賀祥瑞。我言吾邦尊。義勇兼仁智。威靈爲其先。文學爲其次。柳展美人眉。梅舒文士意。春風自東來。渡江訪野寺。舊弊猶有情。詩禪以類至。三人仍五人。半日評二記。天地之太始。渾然無物比。百代一清平。寶祚傳神器。

寒盡

寒盡池塘草已生。物追舊習向春榮。此中與我能同調。獨有梅花不世情。

韓信出跨圖

忍恥真難事易成。斯公大度駕良平。能將蒲伏跨間地。換得淮南七十城。

旅况所見

我與浮萍宛一如。雲溪雨水送居諸。此生一一從頭數。應是前身冷絮餘。

墨蓮

陶君管子愛清姿。寫出香荷一種奇。為厭紅華仍白飾。染衣澹雅學臨池。

雨後

纔從一雨暖如湯。湖上紅梅間翠楊。借問漁翁仙者否。蟻舟戴鶴掉橫塘。

睡夢

睡夢昏昏覺最遲。世人指我喚癡兒。新風未免舊時弊。卻被梅花開口噴。

太峰通雄和尚小祥忌香詞

頓嗅清香感舊因。一枝拈弄一枝新。此中自有靈通在。寄向梅花影亦真。

過法泉寺觀華山所題雙句即用其句作一絕

似主人時梅花盛開故及句中

幽香入室有奇韻。老樹著花無醜枝。將道禪翁亦何遜。盍分一朵換吾詩。

春感

詠桃吟柳忤當權。默與梅花謝世緣。翻想長源兼夢得。十年兩被爲詩選。

書事

欽仰開明德化秋。皇恩至大被僧頭。翻思蓄髮仍妻肉。又使人人得自由。

惜花

惜花情勝惜生思。抱樹悽然獨自悲。可耐東皇渾不省。蠻風蛋雨掠殘枝。

圓乘和尚忌日香詞

大小三乘本一乘。何論次第有階昇。雖然實相妙圓了。須上靈臺層又層。

大般若香詞

般若如良藥。能除諸惡病。又招福除災。願無不善慶。

君看廣大心。人天與歸命。靈妙誰敢疑。宛如鏡照鏡。

過萬松寺詠庭中松走筆以爲宣乘師囑

萬松寺裡一株松。積翠如雲影似龍。長在門庭養精爽。爲師鎮護祝融峰。山號故及

戒田和尚忌日香詞

戒如日月似摩尼。那個心顏寫向誰。二十三年唯一夢。覺來燈影滅明時。

戒孝兩和尚忌日香詞

名實之賓以表心。看來孝戒梵網經曰名孝爲戒共深深。誰知兩老真消息。調在無絃一片琴。

山寺夜坐

坐來一默觀三生。背卻燈華對月明。此際斯心向誰語。宵深獨聽異禽聲。

施食法香詞

七種花兼五種香。更施淨食向先亡。古今幾百靈千萬。來也因緣短又長。

荅人

問神問佛且如何。須觀廟堂楊柳斜。令我強言彼靈意。南枝不妬北枝花。

山房夏夜

標梅熟後竹孫生。靜倚南窗弄晚晴。長日渾無炎熱想。微涼偏有爽秋情。雲收月印蓮塘影。雨霽風傳鶴渚聲。尤是暑中林下好。夜闌猶覺葛衣輕。

晚出教省

著得袈裟上。帝門。一朝使我說齊源。臣僧未至爲農日。要注三章報四恩。

露坐

晚拋書冊步蓮塘。移榻松根占爽涼。今夜廣寒誰灑掃。滿庭月露冷於霜。

縱筆

唸詩吟我語顛狂。不閱周南閱老莊。漁唱樵歌山水韻。便言天趣大文章。

東台有感

癸酉三月偶過寬永寺其荒廢殆不可言時櫻花盛開悵然成詠

沉唸撫古不堪情。這裏鶯遷那裏鳴。生物爭能無憾愴。花雖開口默無聲。五層高塔萬花間。昔年賈島今何去。曾誘詩僧上寶山。堂宇荒殘畫鎖關。昔年賈島今何去。金銀佛寺化塵沙。草木無情惹嘆嗟。忍聽楊花花妓曲。聲々今日助繁華。

一日得閑山行晚投正法寺圓通閣

麻衣與桐屐。來去共悠悠。抱石孤雲靜。投林衆鳥幽。
敢論人貴賤。只要眞優游。此際絕名利。誰歟同我不。
清寂招提境。倚法堂慈雲。靈樹發天香。月皎大圓鏡。
花妍微妙粧。普門觀自在。吾道得明昌。

再投重輪寺

別傳教外好傳誰。要謂單傳不我欺。昨日桃花今夜月。
同參馬祖與靈師。

全邦和尚忌日

不知不識果何因。來捧香華問此眞。將謂邦公閑落索。
菊花老了茗花新。

周欣和尚忌日

夢覺秋風雨後天。算來歲月恰周圓。雖然面面無相識。

一片心香帶氣烟。

某院觀菊

便過籬頭對晚香。一詩欲博一枝芳。當時惠遠蓮花愛。
熟與淵明賞傲霜。花未衰殘葉未殘。夕陽獨立影猶寒。春香讓此秋香好。
好嗅幽香當晚餐。

養昌開山玉峰禪師百五十回忌塔銘四言

玉轉峰回。百半百年。開祖面目。巍然在焉。風鳴竹
樹。月照山顛。神通妙用。觸處綿綿。德化至大。法
運長傳。

謁長谷賢及老和尚堂前桂花盛開詠懷以

呈時安政甲寅八月十八日

逐氣尋香訪老禪。無言一見證前緣。自今不問拈華旨。

花在中庭月在天。

元日梅花

半白僧郎一白花。併看海日曠山霞。新香色即新風色。玉蕊金華飾梵家。

正月五日過興長寺茶堂席上走筆似諸同禪

來敲趙老喫茶禪。興味清香別有天。唯會吾儂今日意。勝他五柳過斜川。

人日賦瓶中梅柳

佳節迎佳氣。歌詠換愁呻。只覺年年老。誰欽歲歲新。展眉開皓齒。共話一回春。不關天下事。瀟灑出風塵。相並占小室。脉脉好精神。青眼含喜色。白鬚動笑唇。誰也爲友者。獨起問天真。處士靖節徒。避世同清貧。愛翫梅與柳。一笑一吟親。千歲一日想。舊緣證新因。

梅唇向人啞

竊遁軍營與鶴親。孤舟片月度春津。不言塞上胡笳妙。中有嚼枚帶甲人。

柳眼含淚見

昨來戰血染春枝。花不能言意自悲。鬼哭魂寒煙雨夜。吞聲死別與生離。

先師佛來老和尚遠芳忌香詞

曾聞寶偈韻猶芳。一片殘霞屬夕陽。心自如梅姿似柳。影連漠漠百花場。建夜文章定慧兩重關。入耳微言徹底寒。拜起併知難與易。背恩太易報恩難。午時

涅槃忌

十分春色五分花。開亦多般落亦多。便是雙林真實相。

真如法在燕鶯歌。

賀良順和尚住大成山

大人來住大成山。山與斯人成一關。應是唐時會昌世。洗磨寶鏡照龍顏。

春懷

今日憂昨日狂矣。草屋凄寒雨浪浪。此際碎花亦何妨。只恐破儂南畝糧。

夜涼散策次本翁韻疊韻三首

夜氣清幽小石橋。真詩活畫雨般饒。流螢巧學流星態。逐此涼光燦玉霄。山雞饒處水螢饒。相如一去猶堪賦。見有明河掛碧霄。波光月影不堪饒。歸來夢落寒山寺。過了楓橋又柳橋。

夜半鐘聲渡遠霄。

和朱子久雨齊居誦經韻

看雲離俗月。聽雨讀仙書。猿鶴傍窓立。香花與影俱。閑甘身後事。總付夢中餘。千古孔門子。幾人斯不如。

可嘆

可嘆又可嘆。嗟吁我意狂。唯憐身落魄。多閱世興亡。一有非推是。終無短適長。此言真實語。實語聽空王。物其多變更。物變亦天成。花色含淒色。禽聲帶怨聲。英雄徒費力。鼓角未收兵。渠我皆兄弟。蚤祈四海平。世換又星移。乾坤異舊時。事皆歸衆滅。人各立多岐。迎婦汗蓮社。教徒泣佛祠。豈其上天意。吁使我心悲。

悼詞爲一竿中折信女

百尺竿頭步已移。菩提煩惱一心知。賢哉女也美如玉。

兜率天生誰敢疑。

山房雜述疊韵三首

悠悠養性好脩禪。屋下溪流屋上山。禽鳥共棲梧竹際。
利名併斷是非間。風晴雨罷夜應寂。月走雲忙天未開。
自覺幽居幽更可。揩磨病眼洗塵顏。
擺落塵紛避俗緣。灑然愛此好青山。花仍薄命須臾際。
蝶亦幽魂短夢間。白髮尊羸人貴位。黃金賤買我高閑。
百年更好脩仙訣。將此新顏換舊顏。
收拾琴書與石泉。夜來靜坐對家山。孤圓月桂榭臺上。
一隊雲過牛斗間。巧者何能如直拙。忙人豈得及清閑。
嗟今李杜仍陶謝。細讀文詩獨解顏。

雨夜思鄉

思鄉淚勝雨聲深。滴滴催詩入短吟。昨夜雨連今夜雨。

一般心作兩般心。

放言

空門人不到。晝寂夜還涼。月吐光明偈。花呈解脫香。
洞中龍世界。天上鶴家鄉。清夢蘊蘊覺。依然在草堂。
我亦愛吾廬。且人與世疎。雲山憐去住。鬚髮感居諸。
養老甘禪語。安心閱道書。閑來殊得趣。此趣得誰如。

洗

耳

圖

長短句同清人
龔慎甫韻得文

此水滾滾然而流入涇渭之際。此水洋洋乎而溢出洙泗
之間。問着此水歸何處。遠朝江海繞天山。君不見。
漁父歌兮滄浪曲。清濯纓兮濁濯足。嗟吁乎。由也洗
耳本迂濶。非人累君心累君。任他堯公一言大。孰與
我耳不曾聞。

重九玩蘭寫懷以寄清人龔慎甫

東籬菊未發。三徑已將荒。中有蘭之秀。爲吾飾重陽。
 蘭也真箇聖。花心葉身香。天質自然勢。可謂花中王。
 他皆不堪賞。顏狀太淒涼。愛菊我心醉。愛蘭吾體芳。
 無菊唯有蘭。清幽趣自長。避災豈菊耳。於蘭亦有祥。
 登高非我願。我願存茅堂。

成道會述懷并引

余之住大高山既已六年矣其間公私俗事紛擾爲之不
 安一日首尾完全焉矣世尊此日成道下山存也此日上
 山成道矣下山上山本無有二途也若有二途則喪身失
 命乃賦之示徒子實明治己已十二月初八日
 遲矣爺爺老古禪。出山不似入山先。看來至道無難事。
 夢費工夫覺打眠。

元日書懷

去年今日與梅親。花自開時氣自春。有約梅花來不到。
 薄情何啻世間人。
 賞月寄枕山翁
 初更雨霏微。二更月晶營。三更四更際。一碧宇宙清。
 嘗聞中秋夜。雨月同陰晴。天公其有意。於人豈無情。
 良月常不在。獨起訂同盟。明月明年好。此月難合併。
 况命不可斯。會面那可輕。掬彼銀河水。余注鍊眼睛。
 水與天一色。鏡兼月雙明。形影無表裡。心月絕虧盈。
 誰能同此趣。灑然獨倚楹。思君今夜賞。思君觀月行。
 扁舟乘幾人。清唳且幾成。鳴舷以歌詩。吹簫或彈箏。
 沂流攀月窟。應有蛟龍驚。波浪與天湧。天仙欲相迎。
 墨水乃採石。先生白也生。再來不敢誣。詩酒均共平。
 更深天風發。吹我下玉京。寒蛩亦不睡。唧唧引餘聲。

不識公賞月圖

霜滿軍營鴈陣寒。招兵坐月具杯盤。誰知此夜寬平宴。拭眼鈞天仔細看。

慈母至自北越喜而記之

庚午閏十月。十有九日天。林下登音響。起見北堂賢。眼疑心驚恠。一默少間焉。譬猶秦越客。相見而茫然。中心喜津津。發語數欲顛。先賀平安態。握手喜淚傳。至誠歡不竭。掃室煎清泉。香茶共喫了。一味同話禪。聞鳥聲愈好。見山色轉鮮。耳目之所觸。神會可相憐。縱令死有遇。何如見生前。嗟吾非孝子。出家混塵纏。久矣絕存問。卻被慈親先。恩愛何以報。約月俱不眠。從今十秋後。初願得滿全。乘蘆超東海。長壽米壽年。

和羊今 薦月初八日雪侍母寫懷

起捲蘆簾倚小欄。黃雲四散白漫漫。應無凍筍霜魚美。更舉殘杯破峭寒。

不同此興十餘年。佳會良辰笑解顏。今日山莊多雅致。

他鄉山即故鄉山。

滕公有意豈無情。問着慈親作細評。竹臥如龍石如虎。

紛紛敢擬絮盞精。

水仙花

水仙子傍水之湄。影引寒波送逝人。應是湘江神女態。

冒霜帶月待尊親。

花朝後一日送慈母歸北越

歲月難留人難再。世皆無常事易違。傷心作日又今日。至尊示寂老親歸。嗟吁乎。離愁別苦孰同等。啼鳥抱柳不忍飛。

月中雨降

獨步中庭踏影立。天青地白平沙濕。不知月殿有何愁。疑是嫦娥垂涕泣。

晚春

難留日脚易過春。忽忽花飛化暗塵。將謂東君跼蹐輩。奪他景物不知人。

首夏

春後風光雨後山。按詩更作畫圖看。縱令水墨元暉妙。隱樹晴雷可寫難。

雨中螢火為某僧囑

通夜自迷煩惱闇。畢生未覺菩提明。可憐宿業不除滅。燃雨閃風勞此情。

禪小暇

南華一讀擲機禪。靜倚幽窓引睡眠。為蝶為周何足恠。夢魂羽化倒騰天。

慶公過安宅關圖

為君為臣只仁義。是素是緇水魚情。袈裟塔下長力生。不擇強弱殲賊兵。濟世大雄真佛子。與彼來生重今生。征邪歸正般若旨。一心惟願此清平。君不見。豹虎關門堅鍊石。縱令九郎智勇客。此際不借金剛權。爭脫艱危過安宅。

靈隱居作

天恩下賜水雲區。心事悠悠夢亦孤。汲月煎茶塵外味。穿山種藥靜中娛。虛簫浪管生松竹。鬼嘯猩吟動荻蘆。不道幽居多少趣。人來請寫草堂圖。

書懷

靈隱山中靈隱子。衰顏一洗心如水。雖然棄世不關他。也有時風塵我耳。拈華豎拂非今是。舞笏張弓是昨非。吾道無脩證無證。不言一著在先機。將謂山中一素封。眠雲坐石對孤峰。晚來天籟聽逾好。聲自斷巖千尺松。

上圖通閣投正法寺

松風落澗月離雲。古殿沈沈夜色分。便覺觀音妙智力。何唯靈驗普門文。示詩客禪者。模奇擬恠騷人僻。誇悟談空僧者瑕。畢竟詩禪論外物。將言背月又違花。

掃庭

掃庭不敢爲賓來。心地清幽絕點埃。坐愛殘楓紅墜晚。慰人葉葉嘆池臺。

蓬萊行

君不見。蓬萊清淺異昔年。東海已變爲桑田。又不見。綺樹樓閣神仙寂。鶴鳴魚潛倚蘆荻。人生於世何所求。古今皆是夢中遊。虎倒龍顛何足恠。風激雲愁猶未休。嗟吁乎。天乎天不容其私。物盛而衰固可知。今來始見陵谷徒。朝毀樓臺夕城壘。此際麻姑見方平。亦言東海揚塵耳。

舟中所見

一輪大月在中天。影入江流引客船。纔發橫溪向長水。殘蘆禿柳帶寒煙。

題芭蕉翁圖 爲某生囑

杖屨相携到處親。眠花坐月語清真。應知世上皆虛幻。

自證芭蕉葉露身。

春感

人情世事物多違。日見書生人禁闌。林下踈梅湖上柳。

宛然依舊立斜暉。

絕句

翻覆手輕今日態。扶持義重故人情。獨思復古維新際。

誰保清高處士名。

古廟梅花

繫馬宮門拂路塵。肅然獨對古祠春。神兮自在梅花上。

一陣寄香忽逼人。

古城梅花

家國興亡果是天。古城今日草芊芊。唯能不變春風色。

長使梅花護祖先。

古寺梅花

梅爲百億萬分身。分影分香漏幾春。即覺華嚴微妙法。

能令雪月寫精神。

春半

小白長紅處處家。登樓邨廓興逾加。五分春色十分月。

惱我勝於傾國花。

甲戌三月十七日之作

杜牧悵然花結子。維摩病矣月參禪。淺紅色讓深紅色。

一任青年笑老年。

春

老去渾忘死。愁。唯思四體病來秋。高天有意憐孤獨。

直使嫋娥入我樓。

春坐

右插梨花左柳枝。當中抱膝展雙眉。坡公意是吾人意。便道深青淡白詩。

題禪外老人真

禪外忘機機外禪。死中得活活中死。誰圖此老有無心。不道龜毛存手裡。

夜雪

廣寒宮女事驕奢。擺落銀塵與玉沙。清賞雖奇有難忍。夜携竹箒護梅花。

獨鶴

獨鶴高飛不逐群。新清舊濁總無聞。直從紫府見人世。海岳平頭一帶雲。

答人所問

是神是佛回天地。其感其靈亘古今。須見春頭初夏際。

梅花轉入藕花心。

月中雪

今夜同盟奈此情。空華亂墜月晶瑩。棹舟跨馬誰家子。非是王猷即戴生。

雪晴

雪晴鏡樹落花冷。山白寒巖飛瀑冰。昨夜僧禪誰斷臂。庭梅染血不人嚮。

感興

隔隄伴侶曲交加。間倚松門看柳斜。寄語陳朝舊親子。聲聲休唱後庭花。

齊之亡有伴侶曲陳之亡有後庭花皆為亡國之音也

桃園結義圖

花猶有意會英傑。天豈無情扶義雄。果是天真花結實。三軍一統在杯中。

守口如餅

舌端纔動迸真言。強說禪心是禍門。縱有點頭頑石力。何如語默養心源。

竹間雨聲

竹雨淋漓斷復連。琴唇筑舌說心禪。夜深細聽總般若。經卷何惟人所傳。

夏日

鑠石流金甌作城。江村禱雨却炎晴。竹床移倚松陰坐。門外時聞賣雪聲。

書事

鬢髮如蓬又似荆。是僧是俗不分明。愚頑日日摩圓頂。半顧前生半後生。是僧是俗不分明。愚頑日日摩圓頂。任他有髮兼無髮。謗佛人多不敬神。生平事業誤斯身。

恐是離家又混塵。

至日道友携南天燭茗飲之餘詠懷以示

橙黃橘綠四林疎。露菊霜楓一庭荒。萬落銷沈天冷殺。夢過春里仍秋鄉。此時故人偷禪暇。敲我禪榻報至長。賀以數枝南燭子。珊瑚赫赫揚珠光。絕勝紅花朱葉美。猶補破壁飾茅堂。對話商量今古外。拭眼悠悠瞪彼蒼。翻怯計日如計老。不問一陰復一陽。何論日脚長與短。關河一道同匆忙。天影人影相隨去。逝水浮雲杳茫茫。嗟吁乎。上天上天其奈我。昏曉一如運雙行。

春懷長短句

桑生病麥種欲空。春頭春尾雨連風。農夫哭野蠶婦窮。廟堂高人奈始終。

放言

闌風伏雨秋。草樹抱百憂。風中歎搖落。雨餘含慘愁。
 豈唯草樹苦。禽魚亦悵惆。萬物將爛死。獨立傍寒流。
 涇渭猶未分。矯首望荒邱。君不見。實鼎壞足下。頑
 右上人頭。一新雖復古。視今無所由。渾如手翻覆。
 或似舟沈浮。嗟吁乎天也。有情豈無意。惟願天天其
 地地。物與吾人頌太平。悠然看水看山醉。

明治庚午元日書懷

去年今日與梅親。花自開時氣自春。有約梅花來不到。
 薄情何啻世間人。

焚香憶衷叔師二首

次李白對酒
憶賀監詩

燒香招不返。精魄在天真。影淡青松樹。思長萬年
 號山人。誰知世皆夢。自覺花亦塵。下階見空碧。客星
 落敲巾。

叔也一相見。欣然下牀迎。示我馬師偈。笑他買臣榮。
 引袂司僧職。掛冠放游生。今日思昔日。凄然不堪情。

答人見問

問余何事棲林下。有口無言仰碧霄。四皓嚴陵會神友。
 大觀浮世樂漁樵。不能答人不願聞。時從水面轉山腰。
 買詩賣文花作媒。垂釣伐木鶴是僚。近來佛法忘世法。
 見雲開雨學逍遙。橫拈鐵笛歌欵乃。絕無知音共曲調。
 嗟吁乎。上天下天雲漠漠。南山北山雨蕭蕭。我且欲
 眠君且去。他日再來不相饒。

熊谷蓮師東歸圖

拗折弓刀拜御香。倒乘聽馬向家鄉。源平幾萬孰能事。
 能始能終惟此郎。

辛未歲朝寫懷

新開小室迎大春。緇素一般賀良辰。雙行茶禮真可喜。
年新日新萬物新。君不見。慶福別在椒酒外。東堂笑
對北堂親。

平薩州宿櫻下圖

見機不接了浮華。繫馬芳櫻到日斜。今夜之花今夜月。
一般好此托生涯。警然一見與花親。煙月為媒主接賓。誰料遺蹤陰下宿。
花能寫影月能真。

春雨

淡煙小雨暖如湯。起見燒根新草長。誰料前溪落花落。
分流入飯入茶香。

李白捉月圖

長安地隘不容仙。載酒移舟采石邊。誰料知公天上客。

騎鯨與月倒騰天。

山房即事

黃金白壁飾山莊。景物從天賜素狂。賞此深秋花月外。
松風瑟瑟雨浪浪。

狂吟

天也不能覆。地亦不能載。中有兆民煩。獨起諸大塊。
佛憐人豈憐。人罪佛何罪。挫彼守屋徒。三鼎均誰改。
仰止上宮皇。救世觀自在。母乃再來心。廟堂亦幾殆。
如何我力乏。瘦骨抱斯痲。憑伏神明威。一平清四海。

僧鳥韻寫懷示海鏡闍黎

未作龍華三會曉。靈山大教傳靈鳥。此聲帶月又穿雲。
待彼慈尊長說了。

偶成三首示本翁師

始覺山林愜道情。蒼松綠竹水雲清。悠悠坐夢琴書友。
細聽芭蕉小南聲。蕭蕭照出太明靈。此心欲道無餘意。
一穗寒燈兩帙經。月在雲間水在舂。禪者談禪未必禪。
美人飾美全非美。言君鍊石換心身。賦彼妖花何敢恥。

移竹

終日頽然醉不醒。扶君健僕立江亭。曉來眠覺酒醒了。
瀟灑含情雙眼青。

詩禪十笏室作

放下蘆簾倚竹床。灑然一字炷心香。室雖十笏容沙界。
琴以無絃奏太潢。鍊句成章今日想。磨輒作鏡昨來狂。
真禪不道真詩趣。月入圓窓滿小堂。

寫懷

拈華豎拂非今是。舞笏張弓是昨非。吾道無修證無證。
不言一著在先機。

山房即事

自恃山中一素封。眠雲坐石對孤峰。晚來天籟聽逾好。
聲自斷巖千尺松。

螢

草露生涯冷淡情。誰人似汝免營營。瞥然渡水過林下。
飛入書窓助短檠。入雲引月曉仍昏。記曾苦學參禪外。
明暗雙雙不敢論。奈此風涼雨露恩。

僧本翁來論我詩及參我禪需其書於此賦之

休向他人說我詩。我詩多是背人詞。試於靜處須能看。

詩好人賢讓。我癡。從聞不識不曾疑。敢問如何是祖師。君且勿迷仍勿悟。明心見性自心知。

秋盡

秋盡淒於春盡思。晚來起坐小房櫺。詩存十月之交際。句在先天未判中。雲嶺雲含殘景冷。寒山楓暎落暉紅。勝情勝景并為有。人與化兒其趣同。

自遣

嗟余愚且魯。苦苦費心才。昨為儒客僕。今乃佛與臺。

晚出教省

仰望。天門俛見江。落花飛絮晚雙雙。吾心慘澹無人會。一夜蕭蕭雨打窓。

竹間雨聲

此聲堪聽不堪言。愁雨愁風灑竹繁。應想湘娥相憶淚。暗和風雨送啼痕。

鴈字

紫塞清湘萬里程。濃雲淡墨漫縱橫。慶霄現出鸞文跡。昌世傳來草聖名。筆動黃蘆存古法。箋舒碧水寫新情。方今檣似論評畫。空際嗚嗚恰有聲。

石

林間呼不起。水上坐如愚。默記初平事。知非市井徒。

早春賦懷寄大雲得本和尚三疊韻

三年一別背同盟。也向春風達我情。穿柳早鶯沿水去。帶書歸鴈截雲行。禪心豈敢隔東北。道誼何曾分重輕。試把贈詩拋地見。吟箋四韻有餘聲。

寒夜病床作

禦寒企何及。臥痾起未能。求藥瓦杯冷。思水鐵瓶冰。

晚菊

風穿古窓紙。雪撲殘盞燈。今夜參禪客。誰憐斷臂僧。

旅夜

黃衣白帽兩相宜。更帶寒香老不衰。古代清標今代色。

落葉

依然未改舊時姿。枕燈明滅影。淒雨寂寥聲。耳目關心處。遐思病母情。

楓林之北桂林南。近遠收窓小草庵。耳目何煩真丈室。

東台觀花

根塵敢拂活伽藍。風前許汝無生話。月下客誰有味談。

獨坐繩牀懶開口。此聲一一禪參。

南自三橋仰東台。雲耶雪耶白堆堆。纔入門來風景好。

滿山芳櫻接天開。真箇華嚴清淨界。敢以佛地擬蓬萊。

錦幕飄風紅嘆綠。粉粧繞樹去復來。開花第一何處所。

法王殿又山王臺。金銀作意彫樓閣。煙雲陸續鬪剪裁。

高寺低寺三十六。或恐俗輩惹塵埃。誰種此花煩此境。

余心不樂翻爲哀。嗚呼前人如我意。萬松之間栽萬梅。

小湖水湄清水際。要此高人騁俊才。泛舟詞客戴仙客。

雪月一併共低回。歸歟日落天將暮。歸歟已有山僮催。

遊人一去山寂寂。桐履藜杖放吟回。

露坐

月移牆上冷。風入鼻端酸。一味招誰喫。勝他五味餐。

自適

殘暉雲嘆水。午夜月離山。看見雲仍月。時來破我顏。

寒夜

風收雪月共晶瑩。萬壑千巖水絕聲。今夜鼉山成道是。隔溪有箇冷猿鳴。山寺

題天台山圖

遠望天台翠靄橫。朱欄玉樹杳微明。記曾香剝石橋上。併聽松聲兼瀑聲。

北末晚春

春風漸達北風微。起捲書帷見鴈歸。柳塢煙青花未發。江邨水暖雪初晞。何當麗日聽黃鳥。已是南山采紫薇。不道東君來太晚。惟言節過此心違。

鴈字

記錄春秋下月汀。連翩斷續畫縱橫。慶霄現出鸞文跡。昌世傳來草聖名。筆動黃蘆存古法。箋舒碧水寫新情。誰知灑落風神在。喚起張顛共細評。

爲劔生山田盤囑

學書學劍豈何求。雄壓重瞳亦引愁。截斷生機須靜坐。直心影動一刀頭。

不倒翁

強問心身語默然。勿言此老是風顛。去來不說大乘旨。今古忘機先聖傳。陋室閑時能守坐。塵鄴鬧處亦甘禪。須知真實真消息。箇箇新緣證舊緣。

蟬

一髮山青水亦青。嘈嘈晰晰賽僧扃。誰言齋女氣魂在。聽說無文無字經。

梅

冒雪相尋路已達。還來倚竹問松扉。傍人莫把離騷讀。恐有先生載鶴歸。

梧桐

遮炎佳處引涼幽。露氣重重翠欲流。一葉增時知有閏。西風觸處易成秋。清陰濯樹雲林默。瀟灑題詩杜牧愁。條忽秋生銀漢上。月懸簾外幾梢頭。

慈麟和尚休廣忌

客裏無由飾法筵。聊煎野茗捧那邊。千般識慮千江月。一片心身一炷煙。已是人歸秦越遠。如何獨逗闕宮天。回頭鴈過寒空上。條忽回頭夢七年。留別大雲得本和尚。斯心遠為有東行。歸鄉預約三年別。旅館長思一夜情。道愛自山殊覺重。塵緣於我便知輕。他時請見春風面。無舌花聲引鳥聲。

絕句

將軍御馬朝天日。買舶凌波仰德來。神國威風他不曾。縱裝戰艦便成灰。

病中作

文久癸亥正月元旦

苦役辛勤病百痾。三春背月背花過。此心欲問竟何事。門外時聞長恨歌。

本師忌日禮塔 三月

百感之中感更幽。燒香塔畔引悲愁。無情實相花兼鳥。一半聲傳舊話頭。

立春

曉向皇圖祝紫宸。河清海晏物皆新。願回舜雨堯風日。同作昇平萬歲春。

題松鶴遐齡圖賀泰宗默應禪師華甲

寫出三松士。傍添兩鶴仙。清聲穿玉府。翠影拂瓊筵。

禪者壽如羅漢壽。上天何啻壽千年。

見皓臺傳翁禪師寄書賦此代簡

卷舒幾度意欣然。蹈舞之間默仰天。欲寫斯心難寫得。真言自在不言禪。

梅天雨中作

單衣冷透夾衣加。梅夏如秋雨似麻。三日拈禪三味坐。膽瓶笑口石榴花。

次暑窓隨園韻

微風其奈午炎濃。結夏僧房絕客蹤。何處人間無熱到。笑而相對兩三峰。

盆蓮

水國分身鎮瓦盆。嫌他俗眼怕他煩。亭亭淨立幽齋裡。肅拜芳顏問直言。

墨竹次柳圃翁韻

將道茅堂勝綺櫺。消炎葉路又枝風。盛唐逸士晉賢者。丰態依稀存此中。

墨蘭次前翁韻

一枝健筆寫幽叢。踈壁煙籠淡影濛。間倚繩牀閱芳譜。滿前花葉動香風。

即事

有茶唯自添吾興。無酒其何欠客嬉。君見梅花開口笑。小窓影寫一聯詩。

客中雨夜

孤燈影冷雨聲秋。浙浙蕭蕭物自幽。翻想僧堂禪榻下。竹窓細聽五更頭。

送維戒僧歸天草

送秋時便送君時。君與秋光入送詩。一箇歸身千里恨。
數行過鴈遠天悲。出門無路分南北。還客免愁成別離。
可耐故人今已去。勞生拭眼倚亭危。

記事三首卒賦短情謹奉青松叔魯衷禪師

千役三年夢片時。一朝眠覺苦辛知。世間好事渾凶事。
敢悔先非在宿期。曾上金臺拜法王。只今有謂下連牀。
誰言擔折薪知重。可耐承恩類報讎。退後進前兩住山。
願救微身引愛憐。渾憑德澤證因緣。尊親即我慈非佛。

示某生彈琴

琴瑟相調動鬼神。聲聲下上合天真。赤心帝子知心了。
何隔今人與古人。

馬

所向披靡擅勇名。山營水陣漫橫行。可無伯樂知神骨。
恰有將軍托死生。一日能過千里遠。天風自入四蹄輕。
惟令箕粟常相飽。力破重圍逐萬兵。

鏡

清如瓊壁白如銀。脫體玲瓏水淨因。與汝分毫曾不肯。
於鄉一笑豈無神。胡來漢去明仍現。鳳影鸞形假亦真。
誰認心身能照顧。幻中人對幻中人。

絕句

紫紋金魚世所榮。麻衣草草坐作麼生。與其富貴浮雲樂。
爭似枯禪淡白情。騰躍曾聞鯉化龍。我有靈方誰換骨。
化生未見貓爲虎。即心即佛即空空。

春夕

春月朧明山淺碧。梅含澹粉柳輕煙。惱人夜色供詩本。院落沈沈獨不眠。

詠史

力欲防胡猶起禍。功能過舜反煩民。長城孰與短牆固。果是凶家非別人。

雪中梅花

老樹先春被雪催。清香暗掠鼻端來。生平不喫三蕉葉。只爲孤芳舉一杯。

夜涼散策

杖藜徐步綠揚橋。恰值風涼月色饒。水澗山遐天似洗。遊舟倒欲上青霄。

郊行所見

未敢桃花付色空。尋芳野外又林中。重遊也抱劉郎恨。葵麥依然動晚風。

晚春

難留日脚易過春。忽忽花飛化暗塵。將謂東君跼蹐輩。奪他景物不知人。

鴈居賞月

庾樓袁渚趣無涯。爭奈風光此際佳。衆桂花開香馥郁。萬家酒散客談諧。明招後巷兼前港。影印南街與北街。歌管夜深人寂寂。玉輪斜轉落空措。

一日道友見訪病牀賦此以詠

天也無人奈病何。灑然暗淚濕袈裟。不知落蕊憑誰葬。啼鳥空傳薤露歌。

荷珠